



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

LW4

535, 543, 544, 545,
546

№ 951.

и 5

и 3

№ 873-3

ՍՈՒՐԲ ՍԱՐԳԻՍ

№ 543



(10797-57) 543-2009

Լուս

543

ՊԱՏԵՐՈՒԹԻՒՆ ՎԱՐՈՒՅ

ՍՐԲՈՅՆ ՍԱՐԳՍԻ

ԶՕՐԱՎԱՐԻ

ԹԱՐԳՄԱՆԵԱԼ

Ի ՆԵՐՍԵՍԷ

ՇՆՈՐՀԱԼԻՈՅ



Ի ՎԵՆԵՏԻԿ

Ի Տպարանի Մխիթարեանց

ՌՅԳ - 1854

ԹՈՒՂԹ

ԱՌ Ի ՆԵՐՍԻՍԷ ԵՊԻՍԿՈՊՈՍԷ

ՅԵՂԲՕՐԷ՛ ՏԵԱՌՆ

ԳՐԻԳՈՐԻՍԻ ԿԱԹՈՂԻԿՈՍԻ ՀԱՅՈՑ

ՊԱՏԱՍԽԱՆԻ ԹՂԹՈՅՆ

ԳԵՈՐԳԵԱՅ

ԱՐԵՒԵԼԵԱՆ ԵՊԻՍԿՈՊՈՍԻ

ԱՌԱՋՆՈՐԴԻ

ՍՐԲՈՅ ՈՒՆՏԻՆ ՀԱՂԲԱՏԻ

ՅԱՂԱԳՍ ՀԵՏԱԶՕՏԵԼՈՅ

ԱՌ Ի ՍՏՈՒԳՈՒԹԻՒՆ

ԶՊԱՏՄՈՒԹԻՒՆՍ

ԵՐԱՆԵԼԻՈՅ

ՆԱՀԱՏԱԿԻՆ ՍԱՐԳՍԻ



ՈՐՈՑ քաղձալի է ճշմարտու-
թիւնն յիրս և 'ի բանս , նոցունց և
յաւէտ ըղձալի խնդրելոյն զնա
փոյթ , իբրեւ ական սլատուականի
և գեղեցիկ մարգարտի ըստ իմաստ-
նոյ վաճառականին . որոյ աղագաւ
ոչ ինչ անխայեն յանհասանելեացն
հասումն , կամ 'ի յանձին տաժա-
նումն , կամ 'ի նիւթականաց գոյից
ծախումն . այլ զոսկէհանացն բե-
րելով զնմանութիւն՝ երկրորդ ըզ-
բովանդակ աշխատութիւնս առ սէր
և յոյս վարկանին փարթամու-
թեանն : Ըստ այսր ապացուցի և
զքոյդ տեսանեմք պարզական մտաց
լուսաւորութիւն , խոհական մասին
փափաքող , և համասեռից նորին ,
որով բանականիս զարգարին մա-
սունք . որ և յոգնաբեղուն պտղոցն
քաղցրագունից առ բարւոյդ ծա-
ռոյդ ամբարումն 'ի միոյ աստի ծա-

նուցաւ պաղոյ ճաշակմանէ : Քան-
 զի հոգեւորական այս խնդիր բարե-
 յաղթ վկային Քրիստոսի սրբոյն
 Սարգսի, անճառ պատմութեանն
 քննութիւն առ 'ի գիւտ ճշմարտու-
 թեան, որ 'ի նախնեացն հարց ան-
 տես եղեալ մինչեւ ցմեզ, 'ի քէն
 միայնոյ շարժեցաւ զմերս զարթու-
 ցանել թմբրութիւն 'ի գիւտ այնր
 խնդրոյ : Ասն որոյ և մեք ըստ նշա-
 նակութեանն առ 'ի ձէնջ տուեցե-
 լոց գրով, զոր և ծանուցաւ ձեզ եր-
 բեմն յաղօթական եղբօրն զըուցա-
 տրութենէ առաքեցաք առ եղբարս
 գերասնչակ ուխտին որ յանուն
 սրբոյ միայնական ճգնաւորին Մօր
 Պարսամոյի 1, առ սահմանաւն Մե-
 լիաինոյ հայոց. որպէս զի յարկեղս
 մատենից իւրեանց հետազօտեալ
 քննեսցեն, և եթէ գտցի նշանա-
 կեալն, թարգմանեալ տայցեն մեզ
 զլսնգրելին : Որոց յօժարական սրբ-
 տիւ զառ 'ի մէնջ ընկալեալ խնդրոյ
 փոյթ, պատասխանեցին մերոցն
 զայս ինչ, եթէ վասն զի առ մեզ հա-
 մանման վկայք՝ չորք են կոչեցեալք

Սարգիս . ընկերն Բագոսի՝ որ
 յՌուծափ նահատակեալ . և այլ ոմն
 որ յԱմիթ , և մեւս եւս 'ի Տարայ՝
 ուր հնոցն է երկից մանկանցն , և զօ-
 րավարն Սարգիս հանդերձ որդ-
 ւովն 'ի Պարս վկայեալ . արդ զորոյ
 արդեւք 'ի չորեցունց յայսցանէ
 խնդրէք ստուգել զպատմութիւն :
 Եւ մեզ թէպէտ և այլքն բայց յըն-
 կերէն Բագոսի անծանօթ էին , սա-
 կայն իբրեւ մտօք ինչ տեսանելով ,
 եթէ զոր խնդրեմքն՝ ոչ այլ ոք է 'ի
 սոցունց , բայց զօրավարն անուն՝
 որոյ և որդին . վասն որոյ գրեալ
 առ նոսա կրկին անգամ , զնորայն
 յանուանէ խնդրեցաք թարգմանել
 զվկայութիւն . և նոցա ընկալեալ
 զառ 'ի մէնջն ցուցեալ անուն , և
 թարգմանեալ՝ որքան էր կարողու-
 թիւն , ջերմեռանդն սիրով 'ի ձեռն
 որումն իմասանոյ 'ի նոցանէ Մի-
 քայէլ անուն , աղօտաբար զմեր գի-
 տողի գարութիւն՝ աւաքեցին առ
 մեզ . որ թէպէտ և 'ի յարմարու-
 թիւնս բանից և 'ի շաղկապս բառից
 ոչ զուգիւր ըստ մերումս լեզուոյ ,

սակայն զբնուածիւն բանին և զկարգ
 պատմութեանն ամբողջ ունէր յին-
 քեան : Չոր և մեր ընկալեալ, և
 ըստ չափոյ զօրութեան յղկեալ ըզ-
 դուրս բանիցն և զպատմողականն՝
 առաքեցաք ձեզ և հանուրց եկեղե-
 ցեաց հայաստանեաց՝ գանձ երկ-
 նային և հոգեւոր, որ ծածկեալ էր
 յայլալեզու ագարակի ազանց . և
 այժմ՝ յայտնեցաւ շնորհօքն Քրիս-
 տոսի՝ ի ձեռն քոյին խնդրոյ պա-
 տուականդ՝ ի գլուխս եկեղեցւոյ
 Գէորգէոս : Չոր և քո առեալ սեր-
 մանեացես որպէս զբանն սերմանող
 բանին ընդ ամենայն տեղիս, որք
 կարդան զանուն տեառն, և կա-
 տարեն հանդիսաւոր տօնախմբու-
 թեամբ զյիշատակ սրբոյ վկային :
 Որովք ազատեցին միտք խմաստուն
 լսողաց ի տարբերական կրից թե-
 րակատար այնր պատմութեան .
 յորմէ ոչ ժամանակ, և ոչ տեղի, և
 ոչ թագաւոր, և ոչ թէ յորմէ ազ-
 գէ, և կամ ուստի և յինչ պատ-
 ճառէ յայսքան եկն յառաջադի-
 մութիւն, մինչ զի տարեւոր պա-

տուել զնա տօնիւք և ժողովովք ,
 ծանուցեալ լինի : Նա և որք հակա-
 ռահաբարն բերին Յոյնք և Վիրք
 ընդ վկայիս Աստուծոյ , և ընդ մեզ
 առասպելականս իմն յօդեալ վասն
 սորին բաջաղանս , 'ի ստուգելն զի-
 ղին ճշմարտութիւն , թէ ո՞վ ար-
 դեւք սա իցէ , զղջասցին , կամ ըմ-
 բերանեացին : Եւ մեզ յաղագս
 յայտնութեան ճշմարտագունի
 պատմութեանս փութոյ և երկոց
 վարձ փոխարինի 'ի ձէնջ և յամե-
 նեցունց այս տացի , թողութիւն
 մեզաց 'ի յիշատակի երանեալ վը-
 կայիս հայցել վասն մեր 'ի տեառ-
 նէ . զնոյն ինքն՝ վասն որոյ բանս
 է , բարեխօս ունել ընդ մերոյ փրը-
 կութեան : Եւ արդ սկսցուք 'ի կարգ
 պատմութեանն , զոր ընկալաք գը-
 րով 'ի նախասացեալ սրբոյ ուխտէն
 սպասաւորաց , որ է այսպէս :



ՎԿԱՅԱԲԱՆՈՒԹԻՒՆ

ՍՐԲՈՅՆ ՍԱՐԳՍԻ

ԶՕՐԱՎԱՐԻ

ԵՒ ՈՐԴԻՈՅ ՆՈՐԱ

ՈՐՈՅ ԱՆՈՒՆ ԿՈՉԻ

ՄԱՐՏԻԻՐՈՍ

Ի ՃԱՄԱՆԱԿՍ Թագաւորու-
թեանն Հռոմայեցւոց մեծին Կոս-
տանդիանոսի՝ որ ըստ բնաւորական
բարեւէր կամացն, և ըստ երկնային
կոչմանն՝ ի վերուստ, այն ինչ նոր-
ընծայ ընկալաւ ՚ի Թագաւորս ըզ-
բարեպաշտութիւն հաւատոյ, և
զկրօնս քրիստոնէութեանն, որով
մեհեանք դիւաձոյլ պատկերաց տա-
պալեալ քակէին, և եկեղեցիք
Քրիստոսի պայծառացեալ լուսա-
ւորէին յամենայն տեղիս. և խաւար

հեթանոսական կռամոլութեան
 հալածական լինէր, և մանկունք
 նոր Սիովնի փառազարդեալ շքե-
 ղանային 'ի հանդերձս ոսկեհունն
 պսակեալ և պաճուճեալ. յայնմ
 ժամանակի ծագէր իբրեւ զասող
 լուսապայծառ յաշխարհին Կասպ-
 պագովկեցոց բարեպաշտութեան
 հաւատով այր ոմն զարմանալի և
 հռչակաւոր, որոյ Սարգիս անունն
 ճանաչիւր. որ արքունական հրա-
 մանաւ էր կարգեալ 'ի զինուորու-
 թիւն ընդ զօրս թագաւորին որք 'ի
 Կասպպագովկիա, գերադոյն գոլով
 քան զյոգունս 'ի համադասից զի-
 նուորակցացն յարիական մրցմունս 2
 որ 'ի պատերազմունս բարբարո-
 սաց. Մինչ զի և համբաւ քաջու-
 թեան նորա, որով զհակառակացն
 մղէր մարտակռուութիւն 3, հա-
 սանէր միշտ 'ի լսելիս մեծի թագա-
 ւորին. ուստի և ընդ պարգեւաց
 մեծագունից և պատիւ ստրատելա-
 տութեան առաքէր նմա, և պա-
 տուական 'ի մէջ համապատիւ իշ-
 խանացն և դատաւորաց կողմանցն

այնոցիկ լինել հրամայէր . և եղեալ նորա այնքան մեծ ապատիւ՝ մինչեւ անսալ նմա բոլորիցն պատուասիրաբար , և հպատակել ամենայն խոնարհութեամբ . և ոչ ոք ընդդիմակաց գտանէր առ 'ի նմանէ եղելոցն և հրամայելոցն :

Իսկ սքանչելի այրն Աստուծոյ իբրեւ ընկալաւ յարգունական հրամանացն զգերապատիւն այն իշխանութիւն , ոչ 'ի նիւթական շահավաճառութիւնս 'ի կիր արկանէր զայն և 'ի փառս , այլ 'ի հոգեւորս և յաստուածայինս : Քանզի շքէր ընդ քաղաքս և ընդ գաւառս այնր նահանգաց , և սրբէր զաշխարհն 'ի կռոցն մոլորութենէ , խափանելով զզոհս ճենճերալիր ուրուական պատկերացն սնտաեաց . զի դեռ եւս զօրանայր առ բազումս խաբէութիւն կռապաշտութեանն . ըստ որում զոմանս բանիւ վարդապետութեան ձգէր յուսկանս առաքելականս աւետարանին Քրիստոսի Հոգւոյն իմաստութեամբ . նա և հմուտ գոլով 'ի մանկութենէ

հին և նոր կտակարանաց 4, և զո-
 մանս սպառնալեօք հաւանեցուցա-
 նէր թողուլ զմոլորութիւն և գալ
 առ ճշմարտութիւնն . և զայլս՝ ո-
 րոց սիրելի էր խաւարն անգիտու-
 թեան, և ատելի լոյսն աստուած-
 գիտութեան, հալածականս գա-
 նիւք և տանջանօք առնէր ՚ի հայրե-
 նի գաւառաց . և զբազինս կռոցն
 քակէր ՚ի հիմանց, և փոխանակ շի-
 նէր եկեղեցիս Աստուծոյ, և մատ-
 րունս նախ եղելոց վկայիցն . որովք
 լինէր խնդութիւն աստուածապաշ-
 տից, և սուգ տրտմութեան հակա-
 ռակորդացն դասուց : Եւ ինքն առ
 ինքեան երանելին ուրախ լինէր ընդ
 փառաւորութիւնն Քրիստոսի նո-
 վաւ, և ընդ կործանումն սատա-
 նայի . և այսպիսի բարեանունդ քա-
 ղաքավարութեամբ ըստ պատուի-
 րանացն Աստուծոյ կալով սրբոյն
 ամս բազումս սրբութեամբ և ար-
 դարութեամբ և բաւանդակ առա-
 քինութեանցն մասամբք :

Բարիատեաց և մարդախոշոշ
 բանասարկուն նախանձաբեկ լինէր ՚ի

տեսանել յայնպիսի հանդէս բարե-
 պաշտութեան զերանելին, և ջա-
 նայր խափանել զնա յառաջի եդեալ
 ճանապարհաց վերնոյ քաղաքին Ե-
 րուսաղէմի 'ի ձեռն զանազան փոր-
 ձութեանց. սակայն ոչ զօրէր որքան
 սիւնքն հաւատոյ կայսրն Աստան-
 դիանոս հանդերձ որդւովքն կեն-
 դանի էին յաշխարհի. զի ամրածա-
 ծուկ աջովն Աստուծոյ պարսպեալ
 լինէր, և բարձրանայր օր ըստ օրէ ար-
 քունական մեծամեծ ձրիւք պայծա-
 ւացեալ փառաց 'ի փառս: Մինչեւ
 ըստ յաճախելոյ մեղաց մերոց, յետ
 երկնային խաղաղութեանն եկեղե-
 ցւոյ որ յաւուրց անտի Աստանդեայ
 մեծի և որդւոցն, նստէր յանցաւորն
 Յուլիանոս կոչեցեալն Պառաւա-
 տոս 5 յաթոս թագաւորութե նո-
 ցա. որ իբրեւ զկայծակն ինչ պարա-
 ծածկեալ ընդ յարդիւ թաքուցեալ
 ունէր զկռոցն մոլորութիւն, և 'ի դի-
 պող ժամու իւրոյ չարութեանն զկնի
 բարեպաշտ թագաւորացն վախճա-
 նի՝ վառեալ հրդեհեաց զորս ընդ
 տիեզերս զաստուածեղէն կրօնիցն

պաշտօնեայս . և մնացեալքն 'ի հե-
 թանոսաց մուրեկոցն 'ի կուռս տե-
 ղի գտեալ յառնէին 'ի վերայ հաւա-
 տացեւոցն 'ի Քրիստոս . աւերէին
 զեկեղեցիս և հալածէին զպաշտօ-
 նեայս . և շինէին գարձեալ հրամա-
 նաւ ուրացողին զաւերեալ մեհեանս
 գիցն . և զբազումս 'ի քրիստոնէից
 յեկեղեցականաց և 'ի զինուորաց
 և 'ի ռամկաց պէսպէս չարչարանօք
 տանջեալ ստանանէին յաղագս ճրչ-
 մարտութեան հաւատոցն . և ոմանք
 խոյս տուեալ փախչէին յահէ անօ-
 թինացն , տարաշխարհիկ 'ի հայրենի
 գաւառացն լինելով :


Իսկ երանելին Սարգիս իբրեւ
 զայս ամենայն տեսանէր եղեալ ,
 մտախոհ լինէր առ ինքեան եթէ
 զինչ կամք են Աստուծոյ՝ արասցէ ,
 հայցէր սլաղատանօք . և ահա երե-
 ւեալ նմա Յիսուս 'ի անսլեանն ա-
 սէր . յամ է քեզ , ով Սարգիս , ե-
 լանել յաշխարհէ քումմէ և յազգէ
 ըստ նահապետին Աբրահամու , և
 գնալ յաշխարհ զոր ցուցից քեզ .
 յորում պատրաստեալ է քեզ ան-

դանօր առնուլ զպսակն արդարօւ-
թեան :

Յայնմ ժամանակի համբաւ իմն
հռչակեալ լինէր, եթէ հանգեր-
ձեալ է Յուլիանոս արքայ ելանել
յարեւելս, և ընթանալ պատերազ-
մական օրինօք 'ի Պարս. քանզի կա-
խարդասար աղանդիցն հեթանոսաց
պատրեալ՝ որք զճակատագիրն ա-
սէին, ունել նմա զԱղեքսանդրի մա-
կեդոնացւոյ, աիրել հանգոյն նմին
հանուրց թագաւորութեանց աշ-
խարհի :

Իսկ իբրեւ լուաւ բարեյազմ զօ-
րավարն Սարգիս զյարուցմունս հե-
ղեղացն բռնութեան որ հանգեր-
ձեալ էր հարկանել զխմաստու-
թեան տուն զեկեղեցի, զոր 'ի վե-
րայ վիժի հաւատոյ շինեալ, կամե-
ցաւ գործով զհրամանն տէրունա-
կան կատարել. քանզի ծանեաւ
թէ այս է ժամանակն որ ցուցաւ
նմա 'ի տեսլեանն՝ հալածիլ վասն
արդարութեան, որով և երանելի
լինել : Թողոյր ապա զհայրենին
ժառանգութիւն, զիշխանական ճո-

ՀՄ-ԷԵԷՕ1



խութիւնն , զերեւելի զփառան , և զյոգնախումբ զօրացն զպետութիւն , զառ 'ի մեծամեծացն համագասութիւն , զսննդակցացն զընդաբոյս սիրոյ զուարճութիւն . և բովանդակ իսկ ասել , զպատճառս կելոյ բարիոք նիւթականիս այս մարմնոյ , և ըստ սիրելական 6 հրամանին որ առ մեծատունն , վաճառեալ զստացելոյ գոյլից բազմութիւն՝ բաշխէր կարօտելոյ , և թեթեւանայր ինքն 'ի հոգոց յոքնավրդով հիւթից ծանրութենէ . և փոխանակ ծանուցն և վայրաբերաց՝ զխաչն Քրիստոսի բարձեալ , հետեւիւր նախընթաց կարապետի այնր ճանապարհի :

Աւնոյր ճանապարհակից զՄարտիրոս անուն որդի իւր , որ ոչ էր նուազ բարի արգասեօք մարմնոյն արութեամբ և հոգւոյն առաքինութեամբ յազնուականութենէ հայրենի բարետոհմութեանց . և նախ աղօթիւք առ ճանապարհն ճշմարտութեան սպառաակին , և զայս յաղօթելն իւրեանց ասէին . Աստուած

բողորից և տէր ամենայնի, յորմէ
գոյացան արարածք, և նախախնա-
մին զօրութեամբ քով. որ քաղցր
ես առ ամենեւեան, և գթած առ
երկիւզածս 'ի քէն, որ եղեր ողոր-
մութեամբ քոյով ընդ արդարսն ա-
ռաջինս, և փրկեցեր յիւրաքանչիւր
փորձութեանց զնոսա, դու նոյն
տէր 'ի սկզբանէ մինչեւ ցայժմ և
յամենայն յաւիտեանս: Ասան որոյ
անկեալ առաջի քո հալածեալքս
վասն անուանդ քում սրբոյ, հայ-
ցեմք 'ի քէն լեր կցորդ ճանապար-
հիս մերոյ յոր հանդերձեալ եմք
ընթանալ, որպէս որոց նախ քան
զմեզ սրբոց քոց, մինչեւ հասու-
ցես 'ի մի յօթեւանացդ արդարոց.
մոյժ զմեզ 'ի տուն հօր քո երկնա-
ւորի. և քեզ փառք ընդ հօր և
հոգւոյդ սրբոյ յաւիտեանս. ամէն:

Ապա այնուհետեւ յուզի ան-
կեալ գնային տարագէմ յաշխարհն
հայաստանեայց, առ որ յայնժամ
ունէր զաթոռ թագաւորութեան
հայոց մեծաց Տիրան անուն, որդի
Խոսրովու, որդւոյ Տրդատայ մեծի

և առաքինւոյ . և նորա ընկալեալ
զնոսա սրատուասիրելով պահէ առ-
ինքեան ժամանակս ինչ :

Իսկ ամսւարիշան Յուլիանոս յօք-
նախուռն ամբօխիւ յունովք և հռո-
մայեցւովք և բարբարոսօք ելեալ
յարեւելս գայր յԱնտիօք Ասորւոց .
և զորս գտանէր առ ճանապարհաւն
արս կամ կանայս հաւատացեալս 'ի
Քրիստոս , ընդ զանազան չարչարա-
նօք արկեալ վախճանէր 'ի կենաց :
Եւ այս համբաւ դառնութեան ե-
հաս ընդ բնաւս . յորմէ սասանումն
երկեւղի պաշարէր զամենեւեան . և
փախստեայ եղեալ յոլովից թաք-
չէին 'ի խորաձորս և 'ի ծերպս վի-
մաց : Լինէր լսելի այս և յաշխարհն
հայոց , որովք ոչ սակաւ ինչ խռո-
վէին յերկեւղէ ամսւարշտին . և
այնքան մինչեւ զանգիտեալ արքային
հայոց զերջանիկն այն ունել առ
ինքեան , գուցէ , ասէ , ծանուցեալ
խնդրեցէ , և յոչ տալն խռովու-
թիւն լինել նմա ընդ աշխարհս եւս .
խորհրդակից լինի ապա նմին խոյս
տալ անգուստ և առ Պարսիցն ընթա-

նալ թագաւորն Շապուհ անուն :
 Եւ այս գործիւր ոչ վայրասպար , այլ
 զի ձգէր զնա տնօրէնութիւնն Աս-
 տուծոյ տեսլեամբ 'ի նշանակեալն
 տեղի , յորում հանգերձեալ էր
 պսակիլ վկայութեամբ 'ի Քրիստոս :

Եւ ելեալ վկայութեամբ յաշ-
 խարհէն հայոց հանգերձ որդւովն
 իւրով , և հասեալ 'ի Պարսս յանդի-
 ման լինէր թագաւորին . զոր տե-
 սեալ Շապուհոյ ուրախ եղեւ յոյժ ,
 մանաւանդ իբրեւ լուաւ զհամբաւ
 քաջութեան նորա , և զհատուածի
 պատճառաւ ելանելն 'ի հոռով-
 մոց . և ընկալեալ մեծապատիւ փա-
 ռօք , ընդ առաջին զօրագլխացն
 Պարսից կարգէր զնա , գունդս բա-
 զումս տուեալ 'ի ձեռս նորա , և յա-
 մենայն պատերազմունս առ որս
 առաքեալ լինէր յաջողէր նմա Աս-
 տուած . որով լինէր սիրեցեալ
 յաչս թագաւորին և մեծամեծաց
 նորա : Իսկ երանելին ոչ անձին
 զօրութեան այլ Աստուծոյ տալով
 զյաղթութեան կատարումն . վասն
 որոյ ոչ երբէք նուազեցուցա-

նէր զհոգեւորացն ընծայաբերու-
 թիւն . այլ յարաժամ մատուցա-
 նէր զգոհութեան և զփառաբանու-
 թեան պատարագս առաջի Աստու-
 ծոյ, ոչ միայն զանձին իւրոյ մաքրու-
 թիւն բանաւոր պատարագաց, այլ
 և զանբանից կենդանեաց զենմունս
 բաշխելով 'ի սէտս աղքատաց և կա-
 րօտելոց, ըստ սովորութեան իւ-
 րում 'ի նախնեաց անտի . զորն և
 ուսուցանէր ամենեցուն աննուազ
 կատարել զզենմունս անասնոց 'ի
 նուէրս Աստուծոյ, յաղագս կե-
 րակրելոյ ողորմութեամբ զքաղ-
 ցեալս և զկարօտեալս 7 :

Յայնմ ժամանակի լուր եհասե-
 թէ զօրքն Հոռովմոց որ ընդ Յու-
 լիանոսիւ, աւերեն ասպատակաւ
 զաշխարհն Տաճկաց որ ընդ սահ-
 մանաւ Թագաւորութեանն Շապ-
 սոյ . և հաճոյ թուեցաւ արքային
 առաքել զսուրբն Սարգիս 'ի սահ-
 պանութիւն կողմանցն Տաճկաստա-
 նի, որ էր սահմանակից աշխարհին
 Հոռովմոց . և սրբոյն առեալ ըզ-
 գունդս զօրաց իւրոց հասանէր 'ի

տեղին նախասացեալ, և անդանօր
 դադարեալ ամիսս երիս, բանակէր
 ընդդէմ զօրացն Յուլիանոսի, պա-
 հելով 'ի թշնամեացն ասպատակէ
 զաշխարհն զայն. և զայն լուեալ
 հռովմայեցւոցն, բազմութիւն զօ-
 րաց եկեալ զետեղէին հանդէս սո-
 ցա, և խնդրէին օրինօք պատերազ-
 մել ընդ միմեանս: Իսկ զօրքն որ
 ընդ սրբոյն Սարգսի տեսանելով
 զայնքան ամբօխ բազմութեան զօ-
 րու ծանու և զինու, զանգիտէին
 յոյժ և ասէին կորնչել Յ 'ի ձեռաց
 նոցա, յաղագս անկարելի դու պա-
 տերազմել ընդ այնքան ուժոյ բռ-
 նութեամբ: Իսկ երանելոյն տե-
 սանելով այնքան զանգիտեալս յեր-
 կեւղէ նոցա զիւր զօրան, տեղի ե-
 գիտ յայտնի առնել նոցա զիւրոյ
 զհաւատոյն զճշմարտութիւն, և ըզ-
 հեթանոսականացն աղարտութի Թ,
 ասէր. Եղբարք իմ և զինուորա-
 կիցք, եթէ հաւատայք բոլորով
 սրտիւ յարարիչն երկնի և երկրի,
 ոչ երբէք զարհուրեացին սիրտք ձեր
 'ի բազմութենէ անտի զօրացն թըլ-

նամեաց մերոց . այլ անյազթելի
 զօրութեամբ ճշմարտին Աստուծոյ
 իմոյ , մին 'ի ձէնջ զհազարսն հա-
 լածեսցէ 'ի նոցանէ և երկուքն ըզ-
 բեւրսն շարժեսցեն : Իսկ անուա-
 նեալ աստուածքն ձեր ոչինչ ու-
 նին զօրութիւն , և ոչ լուսաւորքդ
 զոր պաշտէք , և ոչ տարերացդ
 բնութիւնք , և ոչ պատկերք կռոցն
 որոց երկրպագէք . քանզի աչք են
 նոցա և ոչ տեսանեն . ականջք են և
 ոչ լսեն , ձեռք և ոչ շօշափեն , ոտք
 և ոչ գնան , և ոչ բարբառին կո-
 կորդք նոցա և բերանք իւրեանց :
 Եւ նոքա ասեն . Իսկ արդ ո՞ւր է
 Աստուածն քո Սարգիս , եթէ նո-
 քա չեն աստուածք , ցոյց մեզ զի
 տեսեալ հաւատասցուք 'ի նա : Եւ
 ասէ երանելին . Իմ Աստուածն ա-
 մենայն եղելոց է Աստուած , երե-
 լելեաց և աներեւութից . Հայր
 անսկիզբն և անեղ արարիչ եղելոց
 ամենայնի . Որդի ծնեալ 'ի հօրէ
 անմարմնապէս յառաջ քան զյա-
 շիտեանս , էակից հօր և արարչա-
 կից . Հոգին սուրբ բղխումն 'ի հօ-

րէ 10 անժամանակ և անքննաբար ,
 փառակից Հօր և Արդւոյ . երեք ան-
 ձինք կատարեալք , մի բնութիւն և
 մի աստուածութիւն անբաժանելի .
 որով 'ի լինելութիւն եկին արարածք
 ամենայն , երկնայինք և երկրաւորքս ,
 բանական կենդանիք . և որպէս զի-
 մանալի աշխարհն վերին անմարմին
 բանականացն ետ 'ի բնակութիւն ,
 նոյնպէս և զգալի աշխարհս մարմնա-
 ւոր բանականաց 11 մարդկան : Չոր
 ստեղծեալ զմարդն առաջին , և ըզ-
 կինն 'ի հօղոյ և յանմարմին բնու-
 թեանէ հոգւոյ 'ի սրտկեր աստուա-
 ծութեան իւրոյ , եդ զնոսա յանմա-
 հական 'ի դրախտին փափկութեան ,
 'ի միոյ միայն ծառոյ հրամայելով
 չուտել . որք ոչ պահելով զսրա-
 տուիրանս նորա կորուսին զանճա-
 ուելի զփառան . և փոխանակ անմա-
 հութեանն զմահ ժառանգեցին , և
 ընդ օրհնութեանն զանէծս , և ընդ
 դրախտին զփշաբերս երկիր . և փո-
 խանակ անախտաբար աճմանն զոր
 հանդերձեալ էին ունել 'ի դրախ-
 տին , անասնեղէն ծննդեամբ 12

հրամանն ընկալան բազմանալ 'ի վե-
 րայ երկրի . որոց աճեալ 'ի բազմու-
 թեան ոչ կացին 'ի պատուիրանս
 արարչին , առաջին յանցանօքն շա-
 տացեալք . այլ այնքան յաճախեցին
 'ի մեղս՝ մինչեւ բարկանալ Աստու-
 ծոյ 'ի վերայ նոցա , և խրատել ջրով
 և հրով , և զանազան հարուածովք .
 և ոչ միայն ոչ դարձան 'ի բարիս ,
 այլ եւս դրդեցան 'ի չարիս , զի փո-
 խանակ արարչին արարածոցս եր-
 կիր պագանէին : Բայց և այնու ա-
 մենայնիւ ոչ անտես արար զմարդ-
 կային բնութիւնս , այլ յայանեաց
 զինքն արդարոց յիւրաքանչեւր ժա-
 մանակս , խօսելով ընդ Աբրահամու
 և զաւակի նորա . որոց և ետ օրէնս
 գրեալ մատամբ իւրով 'ի տախտակս
 քարեղէնս 'ի ձեռն Մովսէսի առա-
 ջին մարգարէին . երեւեցոյց յեա
 նորա և դասս մարգարէից որք խրա-
 տէին յիւրաքանչեւր ժամանակս
 զմարդիկ . և մարգարէանային վասն
 գալստեան Արդւոյն Աստուծոյ : Ար-
 առաքեալ 'ի հօրէ 'ի փրկութիւն
 ազգի մարդկան , 'ի ժամանակս վեր-

Չինս էառ զմերս բնութիւնն 'ի սրբոյ
 կուսէն Մարիամայ , և ծնեալ 'ի
 նմանէ անախտաբար , շրջեցաւ ընդ
 մարդկան ամս երեսուն , և եկն 'ի
 Յորդանան առ Յովհաննէս մկրտիչ
 առնուլ մկրտութիւնն , զի զմեղս Ա.
 դամայ լուսացէ ջրովն Յորդանա-
 նու . վկայեցաւ յերկնից 'ի Հօրէ
 եթէ Դա է որդի իմ սիրելի , և 'ի
 սուրբ Հոգւոյն աղաւնակերպ իջ-
 մամբ . յայանեաց ինքն զաստուա-
 ծութիւնն իւր 'ի ձեռն պէսպէս
 սքանչելեացն զոր կատարեաց , ըզ-
 հիւանդս բժշկելով , զկոյրս լուսա-
 ւորելով , զմեռեալս յարուցանելով ,
 'ի վերայ ծովուն գնալով , սակաւ
 հացիւ զբերս կերակրելով . և
 զայլս բազմապատիկս , զորս տկա-
 րանայ լեզու առ 'ի պատմել :

Իսկ ազգն հրէական զայսքան
 բարութիւն գտեալ առ 'ի նմանէ ,
 ապերախտ առ բարեգործն եղեն . և
 մատնեալ զնա խաչի և մահու . որ և
 ինքն կամաւ ետ զանձն և ոչ 'ի հար-
 կէ . զի կատարեսցէ զմարդարէիցն
 կանխասացութիւն և զաշխարհի

փրկութիւն . և յայտնի արար 'ի
 մեռանելն մարմնով զզօրութիւն
 աստուածութեան իւրոյ . զի արե-
 գակն խաւարեցաւ , երկիր շարժե-
 ցաւ , վէմք պատառեցան , վարա-
 գոյր տաճարի նոցա հերձաւ , գե-
 րեզմանք բացան և մեռեալք յա-
 րեան . էջ 'ի գերեզման մարմնով
 որպէս մարդ , և յարեաւ ինքնիշ-
 խանաբար յաւուր երրորդի որպէս
 զԱստուած . երեւեցաւ աշակեր-
 տաց իւրոց յետ յարութեանն և
 խօսեցաւ ընդ նոսա զաւուրս քա-
 ռասուն , և համբարձեալ յերկինս
 նստաւ ընդ աջմէ հօր իւրոյ . և
 գալոց է նովին մարմնով գատել
 զազգս ամենայն ըստ իւրաքանչիւր
 գործոց . բարեգործացն և ուղիղ
 հաւատացելոց յԱստուած՝ զբարիս
 հատուցանելով , իսկ չարագործացն
 և անհաւատիցն զտանջանան յաւի-
 տենազանս : Արդ այս է ճշմարիտ
 աստուածպաշտութիւն , որում թէ
 հաւատայք բոլորով սրտիւ ձե-
 րով , և 'ի բաց կայք 'ի խաւարային
 պաշտամանց ձերոց , ընդունիցիք

զյաւհտենից կենդանութիւնն, յոր-
ժամ գայ Քրիստոս փառօք աս-
տուածութեան իւրոյ, և ոչ սան-
ջիցիք ընդ անհաւատսն 'ի հուրն
անվախճան:

Զայս և առաւել քան զսոյն խօ-
սէր երանելին Սարգիս առաջի բազ-
մութեան զօրացն. և բազումք 'ի
նոցանէ հաւատացին 'ի տէր. և
մկրտեցան 'ի քահանայից անտի՝ որք
ընդ սրբոյն:

Իսկ զօրացն հոռովմոց գունդ
բազում հատեալ արշաւել կամելով
'ի կողմանս Տաճկաստանի որք ընդ
պահպանութեամբ սրբոյն Սարգ-
սի, և խաւարային օգովք պա-
շարեալք որպէս Ասորեստանեայն
առ Եղիսէիւ, մոլորէին 'ի ճանա-
պարհէ անտի աշխարհին յոր հան-
դերձեալ էին մտանել, և ցրուեալքն
ոչ տեսանէին զմիմեանս. բազումք
'ի նոցանէ և տեսիլս իմն պատմէին
անմարմնական զօրաց, և ձայն լսելի
եղեալ 'ի նոցանէ, եթէ Մի յան-
դրգնիք պատերազմել ընդ ծառայ-
ին Աստուծոյ սրբոյն Սարգսի,

եթէ ոչ ամենեքեան կորնչիք : Չոր տեսեալ սրբոյն փառս վերառաքէր ամենազօրին Աստուծոյ , և ասէր . Մեծ է տէր մեր և մեծ է զօրութիւն նորա . և ո՞վ պատմեսցէ զըսքանչելիս նորա . եկայք եղբարք իմ պատուահանք , մատուցուք փառս Քրիստոսի Աստուծոյ մերոյ , որ յայտնեաց զողորմութիւն իւր առ ծառայս իւր և զզօրութիւնն առ հակառակորդսն մեր : Իսկ զօրքն ամենայն հաստատեալք 'ի հաւատս , աղաղակէին և ասէին . Մեծ է Աստուածն քրիստոմէկեց և անհաս է զօրութիւն նորա . հաւատամք այսուհետեւ յամենասուրբ Երրորդութիւնն և 'ի մի աստուածութիւնն զոր քարոզեաց մեզ Սարգիս : Եւ մատուցանէին ամենեքեան երկրպագութիւն առաջի Աստուծոյ , և ընծայէին նուէրս բազումս զենամամբ անասնոց կենդանեաց , և ուրախ լինէին միշտ 'ի վարդապետութիւն սրբոյն :

Իսկ բարիատեսցն սատանայ բանասարկուն դրդեաց զումանս 'ի զօ-

լոսց անախի, յորոց ոչ ծագեաց յո-
գիս լուսաւորութիւն աւետարանին
Քրիստոսի . և գնացեալ առ Թագա-
ւորն Շապուհ, Ասստամբեաց, ա-
սեն, Սարգիս յաստուածոց և 'ի
ձէնջ արքայ, և քարոզէ հաւատալ
'ի Յիսուս նաչովրացի, և զգորսն ա-
մենայն ասստամբեցոյց զկնի մոլո-
րութեանն իւրոյ . միաբանեալ է
սիրով և ընդ զորացն հռովմոց :

Զայս ամենայն լուեալ Թագա-
ւորին, և 'ի մեծի եղեալ արտմու-
թեան և խռովութեան, խորհէր
ընդ աւագանւոյն թէ զինչ արաս-
ցէ . և առեալ զխորհուրդս՝ առաքէ
նմա սարգեւս մեծամեծս, գրեալ
առ նա նամակ որ ունէր օրինակ
զայս . Լուսք բարի համբաւ զքէն,
սրատուականդ 'ի զօրագլուխս մեր
Սարգիս, յաղագս մտերիմ լինելոյ
Թագաւորութեանս մերոյ, և ու-
րախ եղաք յոյժ . վասն որոյ սէր մեր
յաճախեաց 'ի վերայ քո որպէս առ
հաւատարիմ ծառայ և իմաստուն .
ըստ որում առաքեաց քեզ Թագա-
ւորութիւնս մեր ձիր արժանաւոր
մեծանձնութեան քո . Ողջ լեր :

Եւ յեա այսորիկ մեւանգամ՝
 խորհրդածեալ արքայն ընդ խոր-
 հրդակիցս իւր, առաքէ զորդի ե-
 րանելոյն՝ որ էր ՚ի գրան արքունի՝
 հրաւիրակ նմին, իբրու զի առանց
 կարծեաց ինչ եկեացէ վաղագոյն,
 գրելով օրինակ զայս. Եհասս առ
 մեզ, ո՛վ վեհագոյնդ զօրագլխաց մե-
 րոց, Սարգիս, կորովամիտ քո ի-
 մաստուժեան համբաւ. զի ըստ օրի-
 նակի խոհական 13 իմաստասիրաց
 շահեցայք զնազաղուժիւն աշխար-
 հիդ նուաճելով զթշնամիսն. արդ-
 վանն զի զայդ բարւոք անօրինեցէք,
 հրամայեացէ այսուհետեւ թագա-
 ւորուժիւն մեր կանխաւ ժամանել
 առ մեզ ընդ որդւոյ քում. քանզի
 կարօտիմք զկատարեալ քո խոհե-
 մուժիւն խորհրդակից առնլոյ յա-
 զագս թագաւորուժեանն հռով-
 մայեցւոց, հուսլ հանդերձեալ տա-
 լոյ ընդ մեզ պատերազմ. Ողջ լեր:

Եւ յուզի անկեալ որդւոյ նորա
 մերձ գայր ՚ի սահմանն յորում էր
 բանակետղ հօր նորա 14. և ՚ի ճա-
 նասպարհի անդ պատահեալ թշնա-

մեացն դասուց, ըմբռնեցին զսա-
 տանին և զորս ընդ նմա, և տարան
 ՚ի քանակն իւրեանց. և ազգ եղեալ
 սրբոյն ներգործութիւն իրացն որ
 յազգմանէ չարին, տրամութիւն ոչ
 սակաւ տիրեաց նմա և ամենայն զօ-
 րացն: Ապա զմարդկային օգնակա-
 նութեան յուսոյ անվոյթ արա-
 րեալ, յԱստուած ասլաւինէր. ու-
 րում և սլաղատանս արտասուելից
 առաջի անկեալ մատուցանէր. յի-
 շելով յաղօթելն զսքանչելեացն ըղ-
 կատարումն յիւրաքանչելր դարս
 առ Կոյ և Աբրահամ, Իսահակ և
 Յակովբ և ամենայն նահապետն,
 եթէ Որպէս լուար աղօթից նոցա,
 լուր և ինձ մեղաւորիս. և ըստ ու-
 րում Յակովբայ արդարոյ շնորհե-
 ցեր զՅովսէփ ՚ի տեսանել, տուր և
 ինձ զորդի իմ վերստին տեսանել.
 զի մի գայթակղեալ կորիցեն նոր
 հաւատացեալ ժողովուրդս որք
 դարձան առ քեզ քարոզութեամբ
 ծառայի քո, այլ արա տեսանել
 սոցա զողորմութիւն քո առ իս ՚ի
 փառս անուանդ քո սրբոյ: Եւ զե-

ըիս աւուրս ոչ դադարէր յաղօթե-
 լոյ զցայգ և զցերեկ . և ահա յա-
 ւուրն երրորդի առեալ զորդի նո-
 րա որք ըմբռնեցինն և զորս ընդ
 նմա՝ ածին առաջի երանելոյն
 պատմելով զեղեալ սքանչելիսն իմն
 առ նոսա , եթէ յորմէ հետէ մուծաք
 զսա ՚ի բանակ անդր , ոչ դադա-
 րեաց խառովութիւն ՚ի զօրացն , մին-
 չեւ զմիմեանս սատակել բազմաց .
 և տեսիլ երեւեալ զօրագլխացն , Ե-
 թէ ոչ դարձուցանէք զպատա-
 նեակդ առ հայր իւր , ամենեքեան ,
 ասէ , սատակիցիք : Զոր տեսեալ
 երանելոյն և լուեալ , լի եղեւ խըն-
 դութեամբ , և անկեալ ՚ի վերայ ե-
 րեսաց իւրոց գոհանայր զԱստու-
 ծոյ , և տօն ուրախութեան կատա-
 րէին զօրն զայն՝ զէնամբ խոյոց և
 զուարակաց ՚ի նուէրս անուան
 Բարձրելոյն , զորս բաշխելով կա-
 րօտելոց , ուրախ լինէին ՚ի տէր հո-
 գեւոր և մարմնաւոր խնդութեամբ :

Յետ այսորիկ իբրեւ լուաւ սուրբն
 Սարգիս յորդւոյ իւրմէ զհրա-
 մանս թագաւորին , զի կոչէր զնա

ստիպով, ծանեաւ հոգւովն զչա-
 բութիւն ամպարշտին, և կոչեցեալ
 առ ինքն զղօրսն ամենայն որք հա-
 ւատով զօրացեալ հաւատացեալ
 էին 'ի Քրիստոս, ասէ ցնոսա. Եղ-
 բարք, ասա ժամանակ ընդունելի,
 յորում պարտ է զբարեպաշտու-
 թիւն հաւատոց մերոց յայանի առ-
 նել. և խոստովանել զտէր մեր
 Յիսուս Քրիստոս առաջի մարդ-
 կան, զի և նա խոստովանեացի զմեզ
 առաջի հօր իւրոյ և հրեշտակաց
 սրբոց: Իսկ զօրացն իբրեւ ընդ մի
 բերան պատասխանի տուեալ նմա
 ասեն. Ընդ քեզ եմք, ո՛վ հայր
 պատուական, 'ի կեալ և 'ի մեռա-
 նեալ: Եւ սուրբն ասէ. հրամայեալ
 է մեզ 'ի տեառնէ ոչ ծածկել զլոյս
 հաւատոց մերոց, այլ դնել 'ի վե-
 րայ աշտանակի, և քարոզել 'ի վե-
 րայ տանեաց. և մի երկնչել յայն-
 ցանէ որ զմարմին ապականեն և զո-
 գին ոչ: Բայց ես անպիտանս յա-
 մենայնի ստացական ստունգանող
 գտայ հրամանաց տեառն իմոյ. քան-
 զի ծածկեցի յիս ինքեան իբրեւ

զճրագ ընդ գրուանաւ զըռւսաւո-
 րու թիւն հաւատոյն որ առ նա՝ յա-
 ղագս երկեւղի մարդկան : Այլ
 այժմ՝ եղբարք , աղաչեցէք զտէր ,
 զի տացէ ինձ համարձակութիւն
 աներկեւղ քարոզեալ զանունս նո-
 րա առաջի թագաւորաց և իշխա-
 նաց . և հաստատեացէ զոտս իմ՝ ի
 վերայ վիմին հաւատոյ , զի մի սա-
 սանեցայց ՚ի մարդկանէ , որոց հան-
 դերձեալ եմ՝ կալ առաջի . քանզի
 այնր աղագաւ է կոչումնս այս : Եւ
 զօրականացն պատասխանի տուեալ
 ասէն ցտւրբն . Աղաչեմք և խոր-
 հըրդակից լինիմք տեառնդ մերոյ՝
 ոչ տեսանել զերեսս բռնաւորին ,
 և մի ինչ զանգիտեր . քանզի յամե-
 նայն պատերազմունս որ պատահէն
 առաջի քո մեռանիմք ամենեքեան
 մեք . նա թէ մարտիցէ ընդ մեզ ,
 յաղթեմք նմա զօրութեամբ տեառն
 մերոյ յոր հաւատացաքս : Պատաս-
 խանի ետ ստւրբն և ասէ ցնոսա . Ոչ
 հրամայէ տէր մեր ըստ մարմնոյ զօ-
 րանալ , այլ հոգւով . և ոչ պատե-
 րազմական մենքենայիւք , այլ համ-

բերուածեամբ մեր 'ի նեղութիւնս
 յաղթել թշնամեաց մերոց : Արդ
 մի խաւիանէք զիս յառաջակայ ըն-
 թացից կենաց ճանապարհին , այլ
 աղաչեցէք զտէր զի արժանի արաս-
 ցէ զիս մեռանել վասն անուան իւ-
 րոյ սրբոյ . և ձեզ հովանի լիցի աջ
 նորա , և հաստատեացէ 'ի հաւատս
 ճշմարիտս զոր ընկալայք 'ի շնորհաց
 սուրբ հոգւոյն . և եթէ սիրէք զնա
 բոլորով սրտիւ ձերով , նոյն ինքն
 եղիցի ձեզ փրկութիւն 'ի կեանս
 յայս , և յաւիտենական կենացն
 արժանի արասցէ ընդ ամենայն
 սուրբս :

Զայս և որ սոցին նման խօսեցաւ
 երանելին ընդ հաւատացեալ զօ-
 րացն , հաստատէր զնոսա 'ի հա-
 ւատս . և ապա բաժանեալք 'ի մի-
 մեանց բազում արտասուօք հան-
 դերձ որդւովն , և ոմանք 'ի զօրա-
 կանացն յուղի անկեալ դային առ
 թագաւորն . զոր տեսեալ ուրախ
 եղեւ յոյժ . և ասէ ցխորհրդա-
 կիցսն իւր . Կարծեմ անիրաւ գող
 զամբաստանութիւնն զնմանէ , և

'ի նախանձուէ շարժեալք, այլ ոչ
 ուղղութեամբ: Եւ դարձեալ 'ի
 սուրբն Սարգիս ասէ. Բարի է գա-
 լուստ քո իմաստունն և հաւատա-
 ըիմ 'ի զօրագլուխս իմ. ընկալցիս
 ողորմութիւն առ 'ի մէնջ ըստ ան-
 ստերեւր հաւատոց որ ցուցեր
 մեզ: Ասան որոյ մեծացուցանէ ըզ-
 քեզ թագաւորութիւն մեր. և
 գլուխ ամենայն զօրաց կացուցէ
 յաղագս խոհեմագոյն քո իմաստու-
 թեան: Եւ շնորհէր նմա ձիրս բա-
 զումս և պատիւս գերասլանծ ճո-
 խութեան և պայծառութեան:
 Բայց նա ոչ 'ի բանից անտի պար-
 տեցաւ, և ոչ 'ի ճշմարտութենէն՝
 յաղագս երեւելի մեծութեանն՝
 այլափոխեցաւ. այլ տայր նմա պա-
 տասխանի իմաստախոհ բանիւք. Գո-
 հանամ, ասէ, զԱստուծոյ իմոյ որ
 փրկեաց զիս 'ի ձեռաց թշնամեաց
 իմոց, որք ոչ իմաստութեամբ մե-
 ըով և ոչ զօրութեամբ յաղթահա-
 ըեցաք, այլ ամենազօրին Աստուծոյ
 կարողութեամբ. նովաւ են և պար-
 գեւքն շնորհեալք առ 'ի ձէնջ.

քանզի եւս ձեզ իմաստութիւն ճա-
 նաչել զճշմարիտն : Եւ զայս ասա-
 ցեալ սրբոյն , ել յերեսաց նորա :
 Եւ ասէ թագաւորն ցմերձակայս
 իւր . Կատարեալ 'ի ճշմարտութեան
 տեսանեմ զայրս զայս : Իսկ չարա-
 խօսքն յառաջ մատուցեալ ասէն .
 Թագաւոր և արքայ քաջ , զնազո-
 վրացւոյն ունի զուսումն և զազանգն ,
 վասն որոյ և Աստուած ոչ զմերս
 այլ զնազովրացին զՅիսուս անուա-
 նէ . ասպա թէ ոչ՝ հարցցէ ցնա թա-
 գաւորութիւն քո , և ծանիցէ զբա-
 նիս մերոյ զճշմարտութիւն : Եւ իբ-
 րեւ լուաւ զայս թագաւորն , արրա-
 մեցաւ յոյժ , և խորհէր 'ի միտս ,
 թէ զիսորդ գացէ զասացելոցն իրա-
 ւաբանութիւն :

Եւ ընդ աւուրսն ընդ այնոսիկ
 էին տօն աստուածոցն . և ել հրա-
 ման յարքայէ ժողովել բազմու-
 թեանն յատրուչանս կրակարանին
 յորում զհուրն լուցանէին ըստ
 պարսկական օրինացն . յորս էին
 կանգնեալ և պատկերք կուոց երկօ-
 տասան : Կոչեցեալ եղեւ և Սարգիս

ընդ պատուական զօրագլխացն գալ
 հանդերձ որդւոյն իւրով՝ ի հանդէսն
 յայն . և երանելոյն ծանուցեալ
 զհասեալ ժամն որ յաղագս Աստու-
 ծոյ պատերազմին , յարուցեալ կայր
 յաղօթս առ Աստուած և ասէր .
 Տէր Աստուած փրկիչ յուսացելոցս
 ՚ի քեզ՝ որ խոստացար ծառայից քոց
 և ասացեր , թէ Յորժամ տանիցեն
 զձեզ առաջի թագաւորաց , մի հո-
 գայցէք վասն տալոյ պատասխանի .
 զի ես տաց ձեզ բան և իմաստու-
 թիւն , որում ոչ կարիցեն ընդդի-
 մակաց լինել հակառակորդքն ձեր .
 արդ տուր և ինձ , տէր , բան ՚ի բա-
 նալ բերանոյ իմոյ յասպարիզիս որ
 առաջի կայ . և զօրացո զիս համ-
 բերել չարչարանաց և համահաւաք
 մահու , որ գանն ՚ի վերայ իմ վասն
 անուանդ քո սրբոյ . և քեզ փառք
 յաւիտեանս :

Եւ իբրեւ կատարեաց զաղօթսն ,
 գնաց հանդերձ որդւոյն իւրով՝ ի
 կոչումն արքային . և տեսեալ զնա
 թագաւորն , ասէ բարձր ձայնիւ .
 Սարգիս , պատուականդ ՚ի զօրա-

դուրսս զօրաց իմոց, յառաջ մա-
 տուցեալ զոհեա հրոյ ըստ օրինի ա-
 մենեցուն մեր, և արկ խունկ առաջի
 մեծամեծաց աստուածոցն, որպէս
 արդարեւ աստուածասէր. որպէս
 զի չարախօսքն քո յամօթ եղեալ,
 պայծառասցիս դու բարձրագոյն
 փառօք: Պատասխանի եա սուրբն
 Սարգիս և ասէ. Ես ճշմարտին Աս-
 տուծոյ մատուցանեմ զոհ և երկրր-
 պագութիւն, այնմ որ արար զեր-
 կինս և զերկիր և որ 'ի նոսա արա-
 րածք իցէն, որ է կենդանի և յա-
 շիտենական թագաւոր. որում
 պարտ էիրն, ո՛վ թագաւոր, եթէ
 ունէիր իմաստութիւն՝ երկիրպա-
 գանել և փառաւորել, և ոչ տար-
 րեղէն արարածոց գոյացելոց 'ի
 նմանէ և անշունչ պատկերաց 'ի
 մարդկանէ եղելոց: Զայս լուեալ
 արքայի ասէ. Ահա յայտնի եղեւ
 մոլորութիւն քո, ո՛վ թագաւորու-
 թեան հակառակ, ո՛վ արբեալք յի-
 մարութեամբ, և զրկող անձին քում
 ինքնակամ 'ի բեւրուց բարեացն
 զորս հանդերձեալ էաք առնել քեզ:

Իսկ դու փոխեցեր զսէր քո առ այր
ուն հրեայ որ վասն մեղաց իւրոց
խաչեցաւ . և այլ եւս բանիւք բազ-
մօք հայհոյէր զՔրիստոս :

Իսկ երանելին իբրեւ լուաւ զայս ,
ոչ կարաց համբերել , այլ լցեալ
զբերան իւր խուխով եթուք ընդ-
դէմ ամպարշտին . և ոյժ առեալ 'ի
հոգւոյն սրբոյ , և ձգեալ զձեռն'
մանրեաց զպատկերս կեղծաւոր կը-
ռոցն . և սսէ . Ո՛վ անմիտք , ա-
հա պաշտամունք ձեր փշրեցան , և
հուրդ որում երկրպագէք , մո-
խիր է ցնդելի : Եւ յորժամ տեսին
զայս և լուան մոգքն և բազմութիւն
հեթանոսացն որ անդ կային , շար-
ժեցան բարկութեամբ 'ի վերայ սրբ-
բոյն . և բուռն հարեալ զնմանէ ,
քարշէին յայսկոյս և յայնկոյս , և
աղաղակէին սպանանել զնա . և 'ի
յանգուգն յարձակմանէ անօրի-
նացն , սպանաւ 'ի մէջ ամբօխին
Մարտիրոս անուն որդի նորա ,
գործով ընկալեալ զվկայականն ա-
նուն , պատկակից նախընթաց վը-
կայիցն եղեալ 'ի Քրիստոս : Իսկ

Թագաւորն արգել զբաղմուծիւնն
 'ի սպանանելոյ զերանելին , և հրա-
 ման ետ կապել երկաթեաւ և դը-
 նել 'ի բանդի . և տրտմեցաւ յաղագս
 մահուան որդւոյ նորա , զի առանց
 կամաց նորա եղեւ :

Իսկ երանելին 'ի բանդին գոհա-
 նայր զԱստուծոյ , զի արժանի եղեւ
 վասն անուան նորա կրել զչարչա-
 րանս և զկասպանս . եւս և վասն որ-
 դւոյ իւրոյ՝ զի վկայական արեամբ
 պսակեցաւ 'ի Քրիստոս . և մինչդեռ
 'ի բանդի անդ կայր յաղօթս , 'ի
 մէջ գիշերին երեւեալ նմա բան-
 սարկուն սատանայ , ասէ . Ով Սար-
 գիս , զի՞նչ շահիս 'ի յամառ խոր-
 հրրդոց . հաւանեա կամաց Թագա-
 ւորին և լեր երանելի յաշխարհի , և
 մի վասն սնտախ յուսոյ լքաներ ըզ-
 կեանս քո : Ասէ ցնա սուրբն Սար-
 գիս . Երթ յետս հակառակորդ ճրչ-
 մարտուծեան և հայր ստուծեան .
 զի խրատ քո ոչ է պատճառ կենաց ,
 այլ մահուն յաւիտենից ունողացն
 զնա , որ ընդ քեզ արկանին 'ի կո-
 րուստ , այնոքիկ որք առնեն զոր

ասեսդ . և նոյնժամայն հալածեալ
չարն եղեւ աներեւոյթ :

Եւ ահա յանկարծակի երեւեալ նմա տէր Յիսուս 'ի բանդին հանդերձ երկնաւոր զօրօքն , և լի եղեւ տունն գերապայծառ լուսով առաւել քան զարեգակն , և լուծան վաղավաղակի կապանք ձեռաց և ոտից երանելոյն : Եւ ձայն լսելի եղեւ 'ի լուսոյ անտի և ասէ . Քաջալերեաց բարի և հաւատարիմ ծառայ իմ Սարգիս . և մի երկիցես 'ի սիրտ քո 'ի սպանողաց զմահկանացու մարմինդ . զի մտանելոց ես 'ի արտմականաց աստի և 'ի հողանիւթ յարկացս յանվախճան ուրախութի լուսեղէն խորանաց տեառն քո : Եւ 'ի տեսիլ լուսոյ փառաց այնորիկ ծագման , ժողովեցան բազմութիւնք որ շուրջ կային ըզբանդիւն 'ի տուն անդր և լցեալք զարմանալեօք , տային փառս ճրչմարտին Աստուծոյ զոր քարոզէրն Սարգիս . մանաւանդ իբրեւ տեսանէին զերանելին Սարգիս զի արձակեալ էր 'ի կապանաց և կայր յա-

ղօթս առ Աստուած . և վաղվաղակի
 երթեալք պատմեցին թագաւորին
 զսքանչելիսն զոր տեսին , և հրա-
 մայէր առաջի իւր ածել զերանե-
 լին : Եւ իբրեւ տարան , ասէ ցնա .
 Ով անիմաստ և թշնամի անձին
 քում . զինչ շահ եբեր քեզ հակա-
 ռակութիւն հրամանաց մերոց , բայց
 թէ զանարգանս և զչարչարանս և
 զմահ որդւոյ քո . և թէ ոչ զղջացեալ
 դառնաս՝ չարաչար մահուամբ ել-
 ցես՝ ի կենացս . իսկ եթէ փոխեսցիս
 յանմիտ խորհրդոց այտի , և գաս
 ՚ի լաւութիւնն , յիշելով զսէրն
 մեր զառաջին , քաղցրութիւն մեր
 և ներողութիւն ոչ համարին ՚ի
 մեզս զօխալանսդ որով յանցաւոր
 գտար . այլ եւս գերագոյն պատուոյ
 և փառաց արժանաւորեսցիս : Արդ
 յայսմ աւուր միայն անսա հրամա-
 նաց մերոց , և յետ այսորիկ երթ առ
 նազովրեցին : Զայս ասէր թագա-
 ւորն , վասն զի ոչ կամէր զմահ սրբ-
 բոյն , քանզի Յուլիանոսի կայսեր
 հասեալ էր համբաւ գալստեան :

Երանելին ասէ . Զամօթ և զնա

Ս . ՍԱՐԳԻՍ .

4

խատինս աստուածոց քոց ոչ զգացեր . քանզի խաւար և անլոյս ես իբրեւ զաստուածան քո . զիանդ տեսանելով մանրեալ զնոսա իբրեւ զփոշի , և ոչ ծանեար զտկարութիւնն նոցա : Այլ իմ պարծանք և յոյս առ Աստուածն իմ է Յիսուս Քրիստոս , զի որպէս զորդին իմ ընկալաւ բարեպաշտութեան հաւատով , և զիս ընկալցի 'ի նոյն հաւատս արմատացեալ և հաստատեալ . զորմէ գոհանամ և փառաւորեմ զի ընկալաւ զպտուղ որովայնի իմոյ , և ոչ ետ խաբել մոլորութեան քո . և արդ ասեմ յայանապէս զի կուրութիւն քո զիս ոչ խաւարեցուցէ , և անիմաստութիւն քո զիս ոչ յիմարեցուցէ :

Իբրեւ լուաւ զայս թագաւորն լի եղեւ սրտմտութեամբ , և հրամայեաց մերկացուցանել 'ի նմանէ զպատմութեանն զինուորական և ասէ . Սարգիս՝ որ ոչ ծանեաւ զպատիւն զանպատուութիւն ծանիցէ և 'ի մեղս իւր մեռցի . և հրաման ետ հանել արտաքոյ քաղաքին և

սպանանել: Արդ առեալ զնա դահ-
 ճացն վարէին զնա բռնութեամբ
 մինչեւ 'ի մահուն տեղի. երթային
 ընդ նմա բազմութիւնք յոյժ քրիս-
 տոնէից և հեթանոսաց. և իբրեւ
 հասին 'ի տեղին որ անուանեալ կո-
 չէր Սալք, դադարեալ սրբոյն,
 քանզի անդանօր հանդերձեալ էր
 կատարիլ, և զձեռս տարածեալ և
 կացեալ յաղօթս բարձր ձայնիւ ա-
 սելով.

Տէր Աստուած յաւիտենական
 որ արժանի արարեր զիս մեռանել
 վասն անուանդ քո սրբոյ, լուր ա-
 ղաչանաց ծառայի քո, և ընկալ զիս
 ընդ այնոսիկ որ սիրեցին զօր երե-
 ւելոյ գալստեան քո, և եղեն
 ճանապարհակից քեզ չարչարանօք
 իռաչի և մահու. և զոր միանգամ
 պատրանօք չարին մեղուցեալ եմ
 'ի մանկութենէ իմմէ առաջի քո
 մինչեւ ցայժմ կամաւ և ակամայ,
 գիտութեամբ և անգիտութեամբ,
 լուա և մաքրեա ողորմութեամբ
 քո 'ի ձեռն հեղման արեան իմոյ:
 Անորհեա և հաւատացելոց քոց

ամենեցուն որք յիշեն զանուն
 իմ՝ ի բարեխօսութիւն, զթողու-
 թիւն մեղաց, և յիւրաքանչիւր վը-
 տանգից զփրկութիւն հոգւոյ և
 մարմնոյ, զգիւաց հալածումն, զհի-
 ւանդաց բժշկութիւն, ի պատե-
 րազմունս յաղթութիւն, ի կա-
 պանաց և ի բանդից զարձակումն,
 ի ծառայութենէ զազատութիւն,
 ի խռովութեանց զխաղաղութիւն,
 ի նեղութեանց անգորրութիւն,
 ի ճանապարհի զառաջնորդական
 պահպանութիւն, ալէկոծելոց ի
 ծովու զհանդարտութիւն, յերաշ-
 տութե՛ զհոսումն անձրեւաց քաղ-
 ցրութեան՝ յառատապէս պտղաբե-
 րութիւն. ի կարկտաբեր և յեղեամն
 արկու օդոց բռնութենէ դադա-
 րումն արագապէս, մարախոյ և ա-
 մենայն մնասակար զեռնոց որ շար-
 թին ի բարկութենէ քումմէ պա-
 տուհասել զմարդիկ վասն մեղաց՝
 զհալածումն. և որք նուիրական ըն-
 ծայիւք և ողորմութեամբ զյիշա-
 տակս մեր կատարեն, ընկալ ի հոտ
 անուշից, և վարձատրեա բիւրապա-

տիկ բարութիւնս աստ և 'ի հան-
դերձելումն . և զհոգիս իմ ընկալ
յօթեվանս արդարոց 'ի հանգիստն
յաւիտենական , և քեզ փառք յա-
ւիտեանս :

Եւ յետ կատարման աղօթիցն ,
էջ առ նա հրեշտակ տեառն յեր-
կնից՝ ունելով 'ի ձեռին իւրում պսակ
լուսապայծառ , և ասէ . Զօրացիր
քաջ նահատակդ Քրիստոսի , և մի
երկնչիր 'ի սպանողացդ զմարմինդ ,
քանզի բացաւ քեզ դուռն արքայ-
ութեան երկնից , և զոր ինչ խըն-
դրեցեր տուաւ քեզ յԱստուծոյ .
և ամենայն հաւատացելոց խըն-
դրուածք յանուն քո շնորհեսցի 'ի
տեառնէ : Եւ տեսեալ բազմու-
թեանն զհրեշտակն Աստուծոյ և ըզ-
պսակն լուսոյ աղաղակէին ասելով .
Մեծ է Աստուածն քրիստոսիկից ,
և բայց 'ի նմանէ այլ ոչ գոյ Աս-
տուած : Իսկ սրբոյն դարձեալ առ
գասս հաւատացեալ զօրացն և աս-
սէ . Լուարուք ինձ այժմ հաւա-
տացեալք 'ի Քրիստոս , որք մերձ ե-
ղեալ տեսանէք զնահատակութիւնս

իմ. մի՛ եղևցի ձեզ տեսանել¹⁵ ըզ-
 մահկանացու մարմնոյ իմոյ կրել
 անյուշաբար զտրամուծիւն. զի ե-
 թէ այսօր և եթէ վաղիւ ընդունե-
 լոց է սա հարկաւորասէս զպարտիս
 նախահօրն. բայց յոյս իմ որ ՚ի
 Քրիստոս՝ անվախճան է. որով ու-
 նիմ վերստին առնուլ զսա անմահ
 և անապական ՚ի գալստեան նորա.
 և ես ցնծամ և ուրախ եմ այսօր,
 զի զփափագումն իմ որ ՚ի ման-
 կուծեանէ՝ կատարեաց Տէր, չար-
 չարանաց իւրոց լինել հաղորդ, և
 վկայիցն պսակաց կցորդ. և որպէս
 զօրացոյց զիս ՚ի պատերազմունս
 մարմնաւորս թշնամեաց, զօրացուս-
 ցէ և այսօր ՚ի վերայ ոգւոյ թըշ-
 նամւոյն, և որք նովաւ պատերազ-
 մին: Եւ արդ իմ զընթացս բարի
 ճանապարհի կենցաղոյս կատարեալ
 և զհաւատսն պահեալ, գնամ ու-
 րախութեամբ առ Քրիստոս. և
 իսողաղութիւնն Աստուծոյ եղևցի
 ընդ ձեզ յաւիտեան: Եւ զայս ա-
 սացեալ եդ ծունր յարեւելս, և
 տեսառնագրեալ զինքն նշանաւ խա-

չին, և խոնարհեցուցեալ զպարա-
 նոցն ասէ. Տէր Յիսուս ընկալ զոգի-
 իմ. և եհատ դահիճն սուսերաւ
 զգլուխ երանելոյն. և նոյնժամայն
 ծագեաց լոյս երկնային և շրջապա-
 տէր զմարմնով նորա. և ցոլացեալ
 ՚ի լուսոյ անտի բոց այրէր զոմանս
 ՚ի հեթանոսաց անտի, և մնացեալքն
 ՚ի նոցանէ փախստական լինէին :
 Եւ ձայն լսելի յերկնից լինէր որ
 ասէր. Վայելչապէս կատարեցեր
 զճգնութիւնդ քո, ո՞վ երանելիդ
 Սարգիս. արդ եկ և ժառանգեաց
 զհանգիստն զյաւիտենական ընդ
 ամենայն սուրբս : Իսկ որք ՚ի զօրաց
 անտի հաւատացեալք ՚ի տեղւոջ
 անդ՝ առեալ զմարմին երանելոյն
 պատեցին մաքուր զգեստիւք : Եւ
 պատմեցաւ այս յականջս թագա-
 ւորին. և առաքեալ դահիճս կո-
 տորեաց ՚ի նոցանէ արս չորեքտա-
 սան որք էին յազգէ անտի Պարսից,
 և հրամայեաց գազանաց արկանել
 զմարմինս նոցա. յորս ոչ մերձեցան
 ըստ տեսչութեանն Աստուծոյ. ա-
 պա խորհուրդ առեալ հրով այրել

զմարմինս վկայեցն Քրիստոսի . վասն
զի բազումք 'ի Պարսիցն յաղագս
սքանչելեացն հաւատացին 'ի տէր :

Եւ մինչ յայսմ խորհրդեան էր
էհաս 'ի լսելիս ամպարշտին շը-
շուկ երկեւղի գալստեանն Յուլիա-
նոսի , և մոռանայր զչարութեան
խորհուրդ որ յաղագս սրբոյն . և
հանդերձեալ սլաարաստէր զզօրսն
ելանել ընդդէմ նորա 'ի պատե-
րայմ : Յայնժամ եկեալ ոմանք 'ի
հաւատացելոցն 'ի գիշերի , և ա-
ռեալ զմարմին սրբոյն Սարգսի և
զորդւոյ նորա և զչորեքտասան զօ-
րականացն պահեցին զգուշու-
թեամբ 'ի պատուական տեղւոջ :

Կատարեցաւ սուրբն Սարգիս և
որք ընդ նմա յամսեանն յունուա-
րի 'ի կատարման աւուր երեսուն և
մի , 'ի թագաւորութեանն Պարսից
Շապհոյ , և հռովմայեցւոց Յու-
լիանոսի : Իսկ 'ի մեզ թագաւորե-
լոյ տեառն մերոյ Յիսուսի Քրիս-
տոսի . ընդ որում հօր միանգամայն
և հոգւոյն սրբոյ փառք իշխանու-
թիւն և պատիւ այժմ և յաւիտե-
նից յաւիտեանս . ամէն :

Թարգմանեցաւ ճառս յասորւոցն
 'ի մերս 'ի ձեռն Միխայելի ուրումն
 կրօնաւորի քահանայի ասորւոյ, և
 յարմարեցաւ ըստ կարի մերում լե-
 զուի շարագրութեամբ 'ի Ներսիսէ
 եպիսկոպոսէ յեղբօրէ կաթողիկո-
 սի Հայոց Գրիգորիսի, 'ի Թուաբե-
 րութեանս Հայոց ՈՒՆ. և մաղթեմք
 զընթերցողսդ և զգաղափարողսդ
 յիշել զաշխատեալքս 'ի սմա աղօ-
 թիւք առաջի Աստուծոյ յաւուր
 տօնի երանելոյն. և զբանսդ յի-
 շատակի գրել յիւրաքանչիւր գը-
 րեալսդ հայցեմք. ամէն :



55
ՊԱՏՄՈՒԹԻՒՆ

ԱՄԱՍԻԱ ՔԱՂԱՔԻ

ԵՒ ՅԱՂԱԳՍ

ՄՆՆԴԵԱՆ ԵՒ ՎԱՐՈՒՅ

ՍՐԲՈՅՆ ԹԵՈԴՈՐՈՍԻ

ԶՕՐԱՎԱՐԻՆ



Ի ՃԱՄԱՆԱԿԻՆ յորում մակեդոնացին Աղեքսանդր Փիլիպպեան կոչեցեալ բազմաբիւրովք 16 անատոլաճուժեան տիեզերակալեացն, Ամասիա 17 ոմն եղբայր Նեքտանեբեայ հօր Աղեքսանդրի հատուածեալ 18 յԵգիպտոսէ, եւ ՚ի Մէջերկրեայ ՚ի 19 կողմն դամբական Պոնտոսի առ երկրորդն կոչեցեալ հայովք, առ որովք հոսի 20 Գայլն գետ ընդ մէջ քարանձաւաց լերանց

անցանելով յանդգնագոյնս 21 , և
այնպէս իջանէ 'ի Պոնտոս Պողեմո-
նական ընդ Թեմիսկիւսիոն դաշտ 22
յանտառախիտ ծովեզերին որ առ
գետեզերքն , ժամանէ 'ի տեղին որ
կոչի Մարմաուիդոն 23 , սկիզբն ա-
ռեալ 'ի Պոնտոսէ 24 'ի քարալե-
րանց : Բագարեալ ազգ 25 առնե-
լով Աղեքսանդրի , հրաման ընդունի
բնակիլ 'ի նմին տեղւոջ , զոր քաղաք
չինեալ իւրովք ծառայիւք և ժողո-
վըրդովք բնակէր 26 , յիւր անուն
կոչեցեալ Ամասիա :

Իսկ յետ բազում ժամանակաց
Միհրդատ քեռայր Տիգրանայ
Հայոց արքայի , կողմնապետ գոլով
աներոյ իւրոյ 'ի Միժակ քաղաքի
որ այժմ կոչի Աեսարիա , գայ ու-
նի զԱմասիա . 'ի Հայս գրաւեալ
տիեզերասահմանակալ քաղաք յար-
դարեաց , ընդարձակագոյնս սարրու-
սեաց առ կատարով լերանցն յեր-
կոցունց կողմանց գետոյն . շինեալ
և զարքունիսն ըստ հիւսիսայ 27 կող-
ման գետոյն առ ստորոտով քարա-
լեռնակին 28 . և նախ ասլառա-

Ժիւք մեծամեծ 29 հաստավիդ կան-
 գնեալ վիմօք, և 'ի վերայ զարքու-
 նիսն կանգնեալ 30 և յարեգակնայ-
 ին գիմի անձաւին շիրիսն քարա-
 կոփս 31 և ճանապարհս սանդխա-
 ձեւս և տունս քարայրս գանձուց
 կռածոյս 32 յօրինեալս համանման
 ձեռակերտացն Շամիրամայ որ 'ի
 Վան և 'ի Խաղնաթկեփայս 33 : Զորս
 լցեալ գանձիւք տիրեաց ոչ սակաւ
 ամս 34 մինչեւ 'ի գալն Պոմպէի .
 ընդ որում մարտուցեալ և պար-
 տեալ Միհրդատայ և անկեալ 'ի
 Պոնտոս մեռանի 'ի Սինոպ : Իսկ
 Պոմպէի առեալ զգանձն յԱմա-
 սիայէ և զյուլովս 'ի բնակչաց փո-
 խեալ շինէ քաղաք յիւր անունն կո-
 չելով Պոմպէոպոլիս : Բայց և զԱ-
 մասիա կալեալ 'ի նախագահութեան
 Եղեսպոնտոսի 35 մետրապոլիս ա-
 ըրեալ, որ լի էր ամենայն չարեօք 36
 և պաշտամամբք սատանայի, մինչեւ
 'ի կենարար 37 քարոզութիւնն ա-
 ռաքելոցն յորում քաղումք հաւա-
 տացին 'ի տէր :

Յորժամ եհաս սուրբ առա-

քեալն Անդրեաս յԱմասիա , և ըզ-
 Փիղիմոս 38 ձեռնադրեալ եպիս-
 կոպոս փոխանակ իւր թողու ան-
 դրը , և ինքն իջանէ 'ի Սինոպ ,
 ուր բազում սքանչելագործու-
 թիւնք արարեալ պատմին : Եւ Փի-
 դիմոս ձեռնադրէ զերանելին Գրի-
 գոր սքանչելագործ եպիսկոպոս
 Նիսիէսարիոյ . և այնպիսի ինչ կար-
 գօք վարեցան երբեմն յայտնի և եր-
 բեմն ծածուկ մինչեւ 'ի ժամանակս
 հալածանաց , յորում բազումք վը-
 կայեցին . և այլ բազմութիւն հա-
 ւատացելոց սարսեալ ղօղեցին 39
 անյայտաբար ունելով զյօժարական
 հաւատան , զոր ոչ կարէին գիտել
 գատաւորքն 40 . այլ և զոր գիտէին
 չգիտացեալս առնէին . քանզի հրա-
 ման ընկալեալ էին 'ի թագաւորէն
 մի խուզել 41 զայնոսիկ ոյք թաքնա-
 բար ունէին 42 զհաւատան , այլ
 միայն զայնոսիկ խոշտանգել որք
 քաջասիրտք համարձակութեամբ
 մարտուցեալ 43 , և յայտնի արհա-
 մարհեն զհրամանս թագաւորացն և
 զպաշտամունս դիցն :

Ընդ այն ժամանակս երանելին
 Թէոդորոս ծնեալ լինի 'ի քրիստո-
 նեայ ծնողաց 'ի գեւղն Սաբուէ 44 .
 որ վեց մղոնաւ աւելի կամ պակաս
 հեռի էր 'ի Աէռիս քաղաքէ եր-
 կրորդ 45 Հայոց . և որսկէս ասեն
 յաւանդական գիրս պատմութեանց
 Թէ մօրն վախճանեալ տղայ զնա
 Թողու և հայրն սնուցանէր զնա 46 .
 և նորա խարշեալ հատ և հատա-
 ջրովն սնուցանէր 47 զնա . և յար-
 բունս հասեալ սքանչելի վարուց
 մանկութեանն՝ սուրբ և պարկեշտ
 ամենայնի 48 . որ զնոյն հատ սի-
 րեալ ոչ ինչ աւելի քան զայն ճա-
 շակէր . և այնպէս հասանէր 'ի տիս 49
 հասակի երիտասարդութեան՝ կա-
 տարեալ մօրուօք խորագունիւք ,
 կարճ հերովք գանգրիւք Թուխ 50
 գունով , ահաւոր տեսեամբ , հռչա-
 կեալ արութեամբ : Զոր տեսեալ 51
 զարմանալի և բազում ուժով՝ կա-
 մեցան զինուորեցուցանել 'ի գունն
 արքունի . այլ նա ոչ առնոյր յանձն
 ասելով . Ես երկնաւորին եմ զի-
 նուորեալ տեառն իմոյ Յիսուսի

Քրիստոսի Աստուծոյն աստուծոց :
 Ձոր իբրեւ ընդ արհամարհի համա-
 րեալ 'ի բաց թողեալ ասացին իւրովի
 գալ յուղղութիւն , գիտելով զյան-
 կարծակի պնդութեանն ընդգիմու-
 թիւն 'ի հակառակութիւն բերե-
 լով 52 , և զհակառակութիւնն 'ի
 վնաս ինքեանց :

Ընդ այն ժամանակս լինէր երա-
 նելին Թէոգորոս ընդ պաաստին
 Եւսեբեայ ուրումն կնոջ այրւոյ ան-
 ցանել առ 'ի պէտս ինչ 53 գործոյ .
 և յուժգին 54 եղեալ տօթոյն , խոր-
 հեցաւ հանգչել 'ի մարգճակին
 պաաստին Եւսեբեայ որ կոչէր Եւ-
 խայիտայ 55 . և կասեալ զձին կող-
 մեցաւ 56 ընդ հովանեաւ անկոցն :
 Ձայն տեսեալ Եւսեբեայ 'ի սրահէ
 անկան իւրոյ 57 , կարկառեալ ըզ-
 ձեռն աղաղակեաց և ասէ . Այ
 հեծեալ , այ հեծեալ , մի դադա-
 ըիր յայդմ տեղւոջ , զի հուպ է
 որջ վիշապի հզօրի 58 , և զայսու
 ժամու ելանէ և շրջի 'ի մարգճա-
 կիդ . գուցէ վնասիս 59 դու կամ
 երիվարդ , այլ յարուցեալ եկ 'ի

անիկա իմ, որպէս զի լուացեալ
զոտս քո և հաց ճաշակեալ հանգի-
ցեա 'ի միջօրէի, և հովուն անկանե-
լոյ 60 երթիցեա զճանապարհս քո :
Պատասխանի ետ երանելին թէ ոգո-
րոս և ասէ . Ես յուսալով յօգնա-
կանութիւնն Աստուծոյն իմոյ՝ յան-
երեւոյթ վիշապէն ոչ երկնչիմ,
թող թէ յերեւելի օձէն . ելցէ ըստ
բանի քում և սատակեցից զնա ա-
նուամբն Քրիստոսի : Իսկ բարե-
պաշտն Եւսեբի իբրեւ լուաւ թէ
զՔրիստոս անուանեաց, և իմա-
ցեալ եթէ հաւատակից իւր է, 'ի
խնդութենէն իւրովի 61 ընթացեալ
ընդ առաջ նորա, և բուռն հարեալ
աղաչէր դնալ անտի, և երթալ
ընդ նմա 'ի առնն իւր 62 : Եւ մինչ
դեռ նա զայն խօսէր՝ եղեւ յան-
կարծակի շարժումն մեծ յոյժ և
շաջիւն գալոյ վիշապին 63 . զոր
փութանակի զգացեալ երանելոյն
Եւսեբեայ ճիչ բարձեալ 64 մե-
ծաձայն, և վիշապն քաջալանջ և
մեծապարանոց ելեալ 65 յարձա-
կեցաւ 'ի վերայ երկովարին ահագին

և անզգամ շնչամբ յոյժ : Յայն-
 ժամ երանելին թէողորոսի կրն-
 քեալ զինքն նշանաւ ամենայազժ
 խաչիւն 66 Քրիստոսի հարկանէր 67
 նիզակաւն զգլուխ վիշապին և շէշ-
 տակի ճեղքեաց և առժամայն սա-
 տակեաց զնա . որոյ տապալեալ 68
 յեղեգանն որ հուպ 'ի ջուրն' իբ-
 րեւ զգերան անարի յոյժ ահագին
 տեսողացն երեւէր : Յայնժամ եղեւ
 ծանօթութիւն և սէր բարեպաշտին
 Եւսեբեայ առ երանելին թէողո-
 րոս 69 որպէս առ յիւրմէ ծնեալ
 որդի : Բայց երանելին թէողորոս
 ոչ գաղարէր 'ի զօրացուցանելոյ
 զհաւատացեալս իւր զհեծեալս , և
 ուսուցանէր վասն անուան տեառն
 Յիսուսի Քրիստոսի , զի յայտնի որ-
 պէս զնայն ընկալցին 70 զհաւատան
 'ի միտս հաստատունս' անտարտելի
 մնալ 'ի հակառակորդացն 'ի յոյսն
 բարեպաշտութեան , 'ի Քրիստոս
 Յիսուս 'ի տէր մէր . որում փառք
 յաւիտեանս յաւիտենից . ամէն :

Այս 71 է պատմութիւն և սկիզբն

չինութեան Ամասիայ քաղաքիս , և
 սրբոյն Թէոդորոսի . բայց զնահա-
 տակուծիւնն 'ի Յայսմաւուրքն գիտ
 և կարգա : Ի Թագաւորուծեան
 Հայոց գրեալ ճառընաիր գտեալ՝
 օրինակեցաք զպատմուծիւնս զայս :

Մաքսիմիանոս և Մաքսիմիոս 72
 Թագաւորք առաքեցին 'ի Հնազան-
 դեալս իշխանուծեան իւրեանց և
 ասեն . Ամենայն քրիստոնեայ որ
 ճաշակեսցէ 'ի զոհից՝ կեցուցէք , և
 որ ոչ կամիցի զոհել կամ ճաշակել ,
 չարաչար դատաստանօք դատեցա-
 ըրուք : Եւ 'ի Ժամանակին յայնմիկ
 ըմբռնեցաւ Թէոդորոս յաշխարհէն
 արեւելից ընդ այլս բազումս , և ա-
 նուն գեղջնորա Սաբուէ . և եկն 'ի
 գունդն կոչեցեալ Մարացւոց . և
 յիշխանուծեան սենեկապետին 73
 Բերենիկեայ էր քաղաք մի , զի ա-
 նուն էր նորա Ամասիա մօտ 'ի Պոն-
 տոս քաղաք , և գունդն նստէր յԱ-
 մասիա : Եւ ամին զերանելին Թէո-
 դորոս և սաիպէին զոհել պիղծ

կուոցն : Իսկ նա իբրեւ հաւատա-
 ըիմ ծառայ Աստուծոյ լցեալ Հոգ-
 ւով սրբով կայր 'ի մէջ բազմու-
 թեանն , և ասէր . Ես քրիստոնեայ
 եմ , և զոհել պղծոց ոչ հաւանիմ :
 Բրինկաս սենեկապետ ասէ . Առ-
 զզէն զինուորութեան քո և զամե-
 նայն զօրս իմ , և հանդերձ բազում
 պատուով երթ և զոհեա աստուա-
 ծոցն մերոց , և առնիս սիրելի թա-
 գաւորին : Թէոդորոս ասէ . Զօրա-
 կան եմ ես իմում թագաւորին
 տեառն Յիսուսի Քրիստոսի , և այ-
 լում զօրական ոչ կարեմ լինել :
 Բերենիկէս սենեկապետ ասէ . Եւ
 սոքա ամենեքեան որ կան ասս
 քրիստոնեայք են և զինուորեալ :
 Պատասխանեալ երանելոյն Թէո-
 դորոսի և ասէ . Իւրաքանչիւր ոք
 գիտէ , որպէս և կամի զինուորի . ես
 զիմն գիտեմ ում զինուորեալն եմ
 թագաւորին անմահի , և այլում
 զինուորել ոչ կամիմ , բայց միայն
 Աստուծոյ մերոյ երկնաւորի , և որ-
 գւոյ նորա տեառն և փրկչին մերոյ
 Յիսուսի Քրիստոսի : Պոսիդոնիոս

դու կենարիոս ասէ . Եւ Աստուածն
 քո որդի՞ ունի : Թէ որդորոս ասաց .
 Այո ունի զբանն ճշմարտութեան ,
 որով զամենայն ինչ արար : Պոսի-
 դոնիոս զառաջաւոր ասէ . Մէք կա-
 րե՞մք ճանաչել զնա : Թէ որդորոս ա-
 սէ . Մարդասէրն Աստուած եւ
 մեզ իմաստութիւն զի ծանխցուք
 զնա . երանի՛ թէ և ձեզ տայր զայն-
 պիտի իմաստութիւն ճանաչել զնա ,
 զի մեծ օգուտ էր ձեզ : Պոսիդոնիոս
 և Բերենիկէս ասացին . Եթէ դառ-
 նամք առ նա , չե՞մք բաւական թո-
 ղուլ զթագաւորն մեր և հաւատալ
 ՚ի նա : Թէ որդորոս ասաց . Ոչինչ
 կարէ ոք խափանել զձեզ ՚ի թողուլ
 զխաւար և դիմել առ լոյս , և զառժա-
 մանակեան համարձակութիւնդ որ
 առ մահկանացու թագաւորն ձեր՝
 ՚ի բաց ընկենուլ և դառնալ յԱս-
 տուած կենդանի և անսպառ հա-
 մարձակութեամբ ճանաչել ձեզ ըզ-
 թագաւորն անմահ , և զինուորել
 նմա յաւիտեան որպէս և ասեսդ :
 Բերենիկաս սենեկապետ ասէ . Ա-
 ղէ տեսցուք այսպէս առնել . տա

ցուք նմա թողութիւն սակաւ աւուրս, որպէս զի խրատեսցէ նա զինքն և զայլս և իւրովին եկեսցէ յօգտակարութիւն իւր. այլ և զայս կասկածեմ, գուցէ և վաղիւ ոք ըզմեզ նախատիցէ: Բայց աղէ տեսցուք և վասն այլոց բազմաց որ են ՚ի նոյն կրօնս:

Եւ առեալ նորա զներումն, այնուհետեւ առեալ զհասակակիցսն իւր խրատէր: Մտլեալ անօրինացն ըմբռնեալ ածին ՚ի միասին, և նոքա մերձենային առ սուրբն Թէոփորոս, և կարգային զնա վարդապետ. իսկ նա զհետ գայր և մեծաձայն աղաղակեալ ուսուցանէր նոցա զճանապարհն փրկութեան և համբերութեան, որպէս զի մի ուրասցին ըզթագաւորն Քրիստոս: Իսկ սուրբ նահատակացն արգելեալ ՚ի բանդին վասն անուանն Քրիստոսի. և երանելոյն Թէոփորոսի գտեալ ժամանակ բարի և պարասպորդ վասն տաճարին հայրենի, ուր կային աստուածք նոցա, երթեալ ՚ի գիշերի հրձիգ արար: Եւ տեսեալ ոմանց

ժնչ գեռ այրէր, և աճապարեալ
կալան զնա: Եւ ի գիս 74 քաղաքա-
պետ երկուցեալ 'ի վերայ իրացն,
ամբաստան եղեալ հանգերձ զինուո-
րօքն, ասէն ցնա. Այ չարամահ չա-
րագութ և անողորմն, զքաղաքս
ձաղ 75 արարեր, զտաճարն հայրե-
նի այրեցեր, և զաստուածսն մեր
Թշնամանեցեր:

Եւ առեալ զերանելին ածին առ
գատաւորն Պոսղիոս ստրատոնացի,
ուսուցանելով այսպէս. Այրս այս
նորեկ 76 'ի քաղաքիս մեծ ոճիրս
գործեաց, զտաճար մօր աստուա-
ծոցն հրձիգ արար, և Թշնամանեաց
զաստուածսն մեր. իսկ իմ ըմբռ-
նեալ զգա ածի առ մեծ իշխանու-
թիւնդ, որպէս զի ընդ յանդուգն
գործոյն սլատուհասի արժանի ա-
րասցես, զի ամենայն ոք գիտասցէ
Թէ չար մահու արժանի է գա: Դա-
տաւորին կոչեալ զԲերենիկաս սե-
նեկապետն ասէ ցնա. Դու ետուր
գմա ժամանակ Թողութեան. զի
յօժարեացի և հրկէզ արասցէ զտա-
ճար աստուածոցն մերոց: Բերինի-

կաս ասէ . Ես բազում անգամ ա-
 ղաչանօք խրատեցի զնա , զի հաւա-
 նեացի , և վասն այնորիկ ետու նմա
 թողութիւն , զի զմտաւ ածեալ զո-
 հեացէ . արդ եթէ նա արհամար-
 հեաց զհրամանս մեր , և քամահեաց
 զաստուածսն , և ընտրեաց զիւրն՝
 ես զի՛նչ առնեմ . դու այսուհետեւ
 զհրամայեալսն քեզ արա : Եւ դա-
 տաւորին նստեալ յաթոռ ատենի ,
 հրամայեաց ածել զԹէոդորոս . և
 եկեալ երանելոյն , ասէ ցնա դա-
 տաւորն . Ընդէր զայդ արարեր .
 փոխանակ երկիր պագանելոյ քո
 աստուածոց մերոց և խուճկս անու-
 շունս մատուցանելոյ , հրկէզ արա-
 րեր : Թէոդորոս ասէ . Ձոր արարի-
 ոչ ուրանամ , փայտ մատուցի յաս-
 տուածսն ձեր , և իբրեւ հուր եղեւ
 փայտն , և վառեցաւ զնմանէ . և ձեր
 աստուածուհին այնպիսի էր որ հուր
 մերձենայր ՚ի նա . գիտասջեք զի
 ՚ի հուր գեհենին մասնելոց են աս-
 տուածքն ձեր , և ընդ նոսին կորըն-
 չելոց էք հոգւով և մարմնով յան-
 շէջ կիզմանն յաւիտեան :

Եւ դատաւորն հրամայեաց ար-
 կանել զնա 'ի տախտասպար, և գա-
 նել յոյժ, և ասէ ցնա հեղ բանիւք
 իւրովք. Եւ այլոց եւս քաջալերէիր
 դու և համարձակութեամբ ան-
 նէիր. այսուհետեւ չար դատաստա-
 նօք դատեցայց զքեզ, և տաց քեզ
 թագաւորական հրամանաց ծառայ-
 ել: Թէոդորոս ասէ. Ոչ այդու բա-
 նիւք հաւանեցուցանես դու զիս,
 և ոչ 'ի տանջանաց զանգիտեմ ես.
 և եթէ այլ եւս ասիւ դատաստանս
 ածես 'ի վերայ իմ՝ չերկնչիմ, զի
 յոյս աստատանի առ Աստուած ե-
 դեալ եմ, որ տայ ինձ համբերու-
 թիւն, և փրկէ զիս 'ի քոյին խա-
 բէութենէդ: Դատաւորն ասէ.
 Զոհեա, և երթ փրկեա 'ի տան-
 ջանացդ: Թէոդորոս ասէ. Ոչ են
 տանջանքս այս յաւիտեան. քանզի
 տէրն իմ և թագաւորն Յիսուս
 Քրիստոս առաջի աչաց իմեց է, և
 փրկէ զիս 'ի տանջանաց քոց զոր
 մատուցանես. և դու զնա ոչ տե-
 սանես, զի կոյր ես, և ոչ տեսանես
 զանձին քո չար: Զայս իբրեւ լուաւ

դատաւորն բարկացաւ յոյժ , և
 մռնչեաց իբրեւ զառիւծ , և հրա-
 մայեաց արկանել զնա 'ի բանդ , և
 կնքեալ զգուրս բանդին , զի 'ի սո-
 վու և 'ի ծարաւու մեռցի : Իսկ ե-
 րանելին Թէոդորոս կերակրէր 'ի
 Հոգւոյն սրբոյ . և 'ի գիշերին յայն-
 միկ երեւեցաւ տէրն մեր Յիսուս
 Քրիստոս և ասէ ցնա . Թէոդորոս
 քաջալերեաց , զի ես ընդ քեզ եմ ,
 և մի առնուր կերակուր ինչ 'ի մարդ-
 կանէ . զի քեզ պատրաստեալ են
 կեանք երկնաւորք . և զայս ասա-
 ցեալ փրկչին վերացաւ 'ի նմանէ , և
 'ի գնալն տեառն սուրբն Թէոդորոս
 սկսաւ սաղմոսել և ասել ուրախու-
 թեամբ զսաղմոսն , և էին բազմու-
 թիւն որ կցորդէին 77 սաղմոսին :
 Իբրեւ լուաւ զայս բանդապետն ,
 յարեաւ ընթացաւ 'ի գուրս բան-
 դին , և ետես զգուրսն փակեալ և
 կնքեալ , և յեռաւ ընդ պատու-
 հանն , և ետես զի բազումք էին ընդ
 նմա սպիտակազգեսաք 78 , և սաղ-
 մոսէին ընդ երանելոյն Թէոդորո-
 սի . և յերկեւղէն գնաց և պատ-

մեաց դատաւորին : Եւ յարուցեալ
 գայր դատաւորն 'ի դուրս բանգին ,
 և ետես զդուրսն փակեալ և կըն-
 քեալ , և զձայն սաղմոսին՝ լսելի լի-
 նէր հանդերձ երանելեաւն թէո-
 գորոսիւ : Եւ հրամայեաց զօրակա-
 նացն շուրջ զբանտիւն սլատել . և
 կային կազմ զինու , կարծելով եթէ
 քրիստոնեայք իցեն ընդ թէոգորո-
 սի . և իբրեւ բացին նոքա զդուրս
 բանտին , ոչ զոք գտին , բայց միայն
 զծառայն Ասաուծոյ զթէոգորոս
 սնդեալ 'ի կոճեղս . և անկաւ ահ
 մեծ 'ի վերայ դատաւորին և որ ընդ
 նմայն էին : Եւ հրամայեաց դատա-
 ւորն տալ նմա զութերորդ մասն
 նկանակին , և զութերորդ բաժին
 ջրոյ դորակի միով : Իսկ երանելի
 նահատակն Ասաուծոյ ըստ գրեցե-
 լումն որ ասէ , եթէ Արդարն 'ի հա-
 ւատոց կեցցէ , ոչինչ կամեցաւ առ-
 նուլ կերակուր ինչ 'ի նոցանէ , այլ
 պատասխանեալ ասէ ցնոսա . Ձիս
 կերակրէ ակերն իմ և թագաւորն ,
 բարերարն և ողորմածն :

Եւ իբրեւ առաւօտ եղեւ հրա-

մայեաց դատաւորն ածել զսուրբն ,
 և ասէ ցնա . Թէողորէ , հաւանեա
 ինձ , և զոհեա աստուածոցն առանց
 չարչարանաց . երդուեալ ամենայն
 աստուածովքն , զի Թագաւորացն
 գրով հաստատեմ զքեզ տէր աշ-
 խարհիս , և քահանայապետ աս-
 տուածոցն , և աթոռակից տէրու-
 թեան իմոյ , և մեծամեծ պարգեւս
 ընկալցիս յինէն : Իսկ երանելին
 համբարձ զաչս իւր յերկինս , կրն-
 քեաց զինքն և ասէ ցբռնաւորն .
 Մարմնոյս ունիս իշխանութիւն , ե-
 թէ 'ի հուր արկանես , եթէ գազա-
 նաց մատնես , և եթէ այլ բաղմա-
 զան տանջանօք վատնես 79 զմար-
 մինս իմ , մինչեւ է շունչ յունդունս
 իմ , ոչ ուրանամ զանուն տեառն
 Աստուծոյ իմոյ Յիսուսի Քրիստոսի :

Յայնժամ 'ի խորհուրդ կոչեաց
 դատաւորն զԲերենիկաս սենեկա-
 պետ , և ասէ ցնա . Ձի՞նչ արաս-
 ցուք զայրս զայս . և հրամայեաց
 կախել զնա գլխովայր , և հարկա-
 նել փշալից գաւազանօք , և հարին
 զնա մինչեւ քանցեցան մարմինք նո-

րա . և ակնարկեաց դահճացն քե-
 րել զնա . և այնչափ քանցեցին
 զնա , մինչեւ մերկացելոց կողիցն
 մարմինքն անկանէր յերկիր . և
 լեարդն թոքոյն հանդերձ երեւէր
 արտաքս : Իսկ երանելին թէոգորոս
 ոչ ինչ տայր սլատասխանի , այլ յա-
 ղօթս կայր , և ասէր . Օրհնեցից ըզ-
 քեզ տէր յամենայն ժամ , հանա-
 պաղ օրհնութիւն քո 'ի բերանի ի-
 մում : Իսկ դատաւորն իբրեւ լսէր
 զայս , կայր զարմացեալ ընդ հա-
 մարձակութիւն 80 սրբոյն : Եւ ասէ
 ցնահատակն երանելի . Ոչ ամաչես ,
 այ տառապեալ քան զամենայն մար-
 դիկ . զի 'ի մարդ ունիս զյոյս քո և
 մանաւանդ 'ի բռնամահիկ . այնպէս
 անբան ես մինչեւ այգալիսի տանջա-
 նաց զքեզ մասնեցեր : Իսկ երանե-
 լի նահատակն թէոգորոս ասէ ցնո-
 սա . Այս ամօթս ինձ եղիցի , և ա-
 մենայն մարդոյ որ երկնչի յԱստու-
 ծոյ , և կարգայ զանուն տեառն Յի-
 սուսի Քրիստոսի :

Եւ ամբօխն 'ի հեռաստանէ կա-
 ցեալ աղաղակէր վաղվաղակի կորու-

սանել զնա : Եւ դատաւորն դար-
 ձեալ յղեաց զկնի զԿիւրղիկոն դա-
 հիճ և ասէ . Ասա նմա զոհեա . և
 երթ թափեաց ՚ի տանջանացդ յայդ-
 ցանէ : Իսկ սուրբ վկայն ճշմարիտ՝
 համարձակեալ Քրիստոսիւ ասէ
 ցբռնաւորն . Այ ամպարիշտ և ասլի-
 րատ , լի ամենայն անիրաւութեամբ
 և թշուառութեամբ , որդի սատա-
 նայի , ժառանգ դժոխոց , և գրա-
 ւական գեհեհինն , մինչեւ յերբ ոչ
 երկնչիս յԱստուծոյ շնորհողէն
 քեզ զայդպիսի իշխանութիւնդ .
 ոչ ամաչես , այնքան յիմար ես և ոչ
 իմանաս թէ թագաւորք Աստուծով
 ունին զթագաւորութիւնս , և դա-
 տաւորք զտէրութիւն : Եւ դու զիս
 բռնադատես թողուլ զԱստուած
 կենդանի . և երկիր սագանել ան-
 շունչ սպտկերաց : Յայնժամ դա-
 տաւորն ասէ ցսուրբ վկայն Թէո-
 դորոս . Չինչ կամիս , այսուհետեւ
 ընդ մեզ լինել թէ ընդ Քրիստոսին
 քում : Իսկ սուրբ վկայն պատաս-
 խանի ետ ուրախութեամբ և ասէ .
 Ես ընդ Քրիստոսին իմում էի , և
 եմ , և եղէց յաւիտեան :

Յայնժամ տեսեալ բռնաւորին
 եթէ ոչ ինչ կարէ օգնել նմա դա-
 տաստանաւն և տանջանօքն, իբրեւ
 ետես զհամարձակութիւն նորա,
 ետ հրաման վճիռ վասն նորա այս-
 պէս. Թէողորոս ոչ հաւանեալ
 բարեյաղթ թագաւորաց և աստուա-
 ծոցն, այլ հաւանեալ Յիսուսի
 Քրիստոսի՝ ի սլահել զաւանդ նո-
 րա, որ խաչեցաւ առ սոնտացւով
 Պիղատոսիւ, որպէս լուայ, զսա
 հրամայեմ հրկէզ առնել, որում և
 արժանի իսկ է: Եւ սպասաւորացն
 վաղվաղակի պատրաստեալ զհուրն
 ՚ի փայտից որ ՚ի պէտս բաղանեաց
 և կամ այլ ինչ իրի, լցին զպէտս իւ-
 րեանց: Յայնժամ հրամայեաց դա-
 տաւորն զփայտիւ արկանել և տա-
 նել ՚ի հուրն. և ածին զերանելին
 ուր հրամայեցաւ, և կամէին հանել
 ՚ի նմանէ մերկանալով զպարեգօսս
 նորա և լուծանել զգօտի նորա.
 զայս առնէին զի փորձէին զնա. իսկ
 երանելին փութայր ինքն զինքն ար-
 կանել ՚ի հուրն: Իսկ յորժամ հուրն
 պատրաստեցաւ, ՚ի բաց եգեալ ըզ-

հանգերձն իւր , և լուծեալ զգօ-
 տին , կամէր և զօգ ոտիցն հանել .
 զի յառաջագոյն զայս չէր արա-
 րեալ : Եւ ընթանային իւրաքանչիւր
 ոք 'ի հաւատացելոցն փութալով
 մերձենալ 'ի քրտունս նորա . և վաղ-
 վաղակի պատրաստեցին առ հուրն
 զգործարանն , և կապեցին և կա-
 մէին հեղուսել ընդ փայտ մի և ըն-
 կենուլ 'ի հուրն , և ասէ նա ցղա-
 հիճան . Թոյլ տուք ինձ , զի որ ետ ինձ
 համբերութիւն , նոյն ինքն կարող
 է և առանց աշխատութեան սլահել
 զիս . յայնժամ ոչ բեւեռեցին զնա ,
 այլ միայն կապեցին : Իսկ երանե-
 լին տեառնագրեաց զինքն 'ի հողին
 սուրբ . և գային ածէին զնա իբրեւ
 զգառն 'ի պատարագ , և իբրեւ ըզ-
 խոյ յողջակէզս : Համբարձ զաչս
 իւր յերկինս և ասէ . Տէր Աստուած
 ամենակալ , որ սիրելոյն քո և օրհ-
 նելոյն տեառն մերոյ Յիսուսի Քրիս-
 տոսի հայրդ ես , որով զքո գիտու-
 թիւնդ ընկալաք , որ կոչեցեր զիս 'ի
 զօրութիւնդ քո , Աստուած զօրու-
 թեանց , և ստեղծ իջ ամենայն արա-

րածոց և ամենայն կենդանեաց որ
 կան առաջի քո, օրհնեմ զքեզ՝ որ
 արժանի արարեր զիս այսօր խառ-
 նիլ՝ ՚ի գունդս սուրբ վկայից քոց,
 և կցորդ բաժակի տեառն մերոյ Յի-
 սուսի Քրիստոսի, և հաւատալ ՚ի
 յարութիւն և ՚ի կեանսն յաւիտե-
 նից շնչով և մարմնով անասպակա-
 նութեամբ հոգւոյն սրբոյ: Եւ ա-
 հա եկեալ եմ իբրեւ զոչևար ՚ի
 սպանդ, զի ընկալեալ եղէց առաջի
 քո այսօր պատարագ պարարտ և ըն-
 դունելի, որպէս պատրաստեցեր
 յառաջագոյն և կատարեցեր ան-
 սուտ և ճշմարիտ Աստուած. վասն
 այսորիկ օրհնեցից զքեզ և փառա-
 լորեցից ՚ի ձեռն քահանայապետիդ
 մերոյ Յիսուսի Քրիստոսի սիրելի
 որդւոյ քո: Տուր ինձ զօրութիւն և
 իմաստութիւն, և շնորհեա կատա-
 րել զընթացս իմ քրիստոնէութե-
 թեամբ, և առնուլ զնշան յաղթու-
 թեան քո: Պարգեւեա տէր և որք
 ընդ իս ըմբռնեցան ՚ի Տիւրովն՝ զի և
 նոքա ճշմարիտ հաւատով ՚ի խոս-
 տովանութեան անուան քո կատա-

րեալ յաղթեսցեն հակառակամարտին, և ընկալցին 'ի քէն զանթառամ սլաակն :

Եւ համբարձեալ զաչս իւր 'ի բազմութիւնն և ետես անդ զՎալինիկէ, որ և զնա և զսա 'ի միասին ածեալ էր 'ի Տիւրուիւնն, աղաղակեաց և ասէ . Վալինիկէ, քեզ մնամ փութա հասանել ինձ . քանզի որ յապականելի ⁸¹ աշխարհիս ոչ թողաք զմիմեանս, այնպէս և 'ի կեանսն յաւիտենից մի թողցուք զմիմեանս . և կատարեալ զբանն, սկսաւ դարձեալ աղօթել այսպէս . Տէր Յիսուս Քրիստոս, որ միջնորդ ես Աստուծոյ և մարդկան, որ արժանի արարեր զիս զտառապեալս յաղթել բռնաւորիս այսորիկ, և կատարել զհանդէսս զայս խոստովանութեամբ անուան ամենասուրբ Երրորդութեանդ . գոհանամ զքէն տէր իմ Յիսուս Քրիստոս, և առաւել գոհանամ և այժմս և յանսպառ յաւիտեանսն : Ընկալ տէր զհոգի իմ խաղաղութեամբ, զի փառաւորեսցի յիս սուրբ անուանդ Հօր

և Որդւոյ և Հոգւոյդ սրբոյ, յիս
տառապետալս որ գաի 'ի քէն զան-
սպառ ողորմութիւն քո, և առաւել-
լեալ եմ 'ի շնորհաց քոց սլարդեալ:

Եւ կատարեալ զաղօթսն առաւել
բորբոքեցին զհօւրն . և վառեալ
հնոցին ելանէր բոցն մինչեւ յեր-
կինս: Եւ իբրեւ եմուտ 'ի հօւրն,
զարմանս մեծամեծս տեսաք, որոց
տուեալ էր տեսանել 'ի հոգւոյն
սրբոյ . զի հօւրն կամարաձեւ ե-
ղեալ իբրեւ զխորան եկաց 'ի վերայ
սրբոյն . և իբրեւ զառագաստ նաւի
հողմուռոյց գոգ առեալ շրջապա-
տեաց զմարմնով նորա . և կայր երա-
նելին 'ի մէջ հնոցին ոչ իբրեւ զմար-
մին մարդոյ այրեցեալ, այլ իբրեւ
զհաց խորովեալ, և իբրեւ զվարդ
անուշահոտ . և օրհնէր մեծաձայն
և փառաւորէր զԱստուած 'ի մէջ
հնոցին և ասէր . Փառք քեզ հայր
սուրբ, փառք քեզ Որդիդ սուրբ
միածին, փառք քեզ Հոգիդ ճշմար-
տութեան, սուրբ Երրորդութիւնդ,
մի աստուածութեանդ, այժմ և միշտ
և յաւիտեանս յաւիտենից: Եւ ա-

սացեալ զամէնն , զօրէն փչման ար-
ձակեաց զհոգին 'ի ձեռս Աստուծոյ .
և տեսաք զհոգին նորա , զի իբրեւ
զփայլակն վերացաւ յերկինս :

Իսկ կին ոմն բարեպաշտօն զի ա-
նուն էր նորա Եւսեբի մեծատուն
յոյժ , խնդրեաց զմարմին նահատա-
կին Քրիստոսի . գինւով և իւղով
կազմեաց զսուրբ նշխարս նորա , և
պատեաց 'ի սուրբ կտաւս , և տա-
րեալ 'ի գեւղն Եւքայիտայ և եգ 'ի
տան իւրում . զյիշատակն կատարե-
լով 'ի փառս ամենասուրբ Երրոր-
դութեանն :

Կատարեցան երկօքին սուրբ վը-
կայքն Քրիստոսի Թէոդորոս և Կա-
լինիկէ բարի խոստովանութեամբ
յանուն տեառն մերոյ Յիսուսի
Քրիստոսի , յամսեան յունիսի յեր-
կրորդում աւուր . 'ի Թագաւորու-
թեանն Մաքսիմիանոսի և Մաքսի-
մոսի . իսկ 'ի մեզ Թագաւորելոյ
տեառն մերոյ Յսի Քսի , ընդ որում
Հօր փառք , իշխանութիւն և պատիւ
հանգերձ Հոգւովն սրբով , ամէն :

ԾԱՆՅՈԹՈՒԹԻՒՆՆԵՐ

1. Պարսամ կամ Պարսամոյ ճրգնող հայրապետ եղեսացի, որիչ է 'ի Պարսամայ ասորւոյ սամոստացւոյ: Գտցեն զայսմանէ խընդրողք լիուլի աւանդեալ 'ի լիակատար վարս սրբոց յ'Ա. հատ. 378:
2. Այլ օրինակ ճշմանացն:
3. Հնագոյնն Տարասկոս-Բիւն:
4. Մեւս օրինակն. հմար գուշ գիտութեան հին և նոր կարասկոսանաց' սեւալ 'ի Տանկո-Բենէ:
5. Մեւս օրինակն Պատմոմար:
6. Մեւս օրինակն արհաւան:
7. Յաղագս Ագապին ակնարկէն բանքս, որոյ սովորութիւն յաճախեալ էր առ նախնի քրիստոնեայս: Զօրմէ տես և յ'Բ հատ. Սովեր. 97:

8. Մեւան ի՞րզէլ :
9. Հնագոյնն՝ ճուար սպռ-նէան :
10. Ըստ Հնոցն սովորութեան զանց
առնէ աստէն յիշատակել զբըղ-
խուսն Հոգւոյն սրբոյ և յՈր-
գւոյ :
11. Հնագոյնն՝ Բանահայտ :
12. Մեւան՝ Բնո-նէամբ :
13. Մեւան՝ արամախոհական :
14. Մեւան՝ Բնակեալ նորին Սարգսի :
15. Հնագոյնն հայել :
16. Մի օր . Բաղճաբի-ր յոգնանաս-
սո-ածո-նէամբն :
17. Մի օր . յԱճասիայ Երեք օր .
Նէփասու-եայ :
18. Երեք օր . հասո-ած եղեալ :
19. Երեք օր . 'ի Տէլ :
20. Մի օր . աս ոչս հոսի Իո-խս . իսկ
մեւան՝ աս ոչս ի՞նչ Գայլ Գէփ :
21. Մի օր . ընդ Տէլոցն քարալեւանց
անցանելով ընդ Լիկոս խառն . մեւան
ընդ Տէլ քարալեւանց :
22. Երկու օր . ճուէիան պնդո-նէամբ
Տո-նէամբ 'ի Սիխո-խոն դաշտ :
23. Մի օր . Մարճատ-իոն :
24. Մի օր . Եղենոս Պոնսոսի 'ի Տէլոցս
քարալեւանց . մեւան 'ի Պոնսոսի :

25. Մի օր . ազգ առնելով . մեւսն
 դարարէալ սսս :
26. Այդպէս երկու օր . իսկ յայլ
 օրինակս պակասէ վերջի հա-
 տածն :
27. Մի օր . ընդ հիւսիսաւորն գե-
 րոյն :
28. Մի օր . առ սարգոսով քարազէան
 յակիւնդ և նախապատարիւք հասար-
 քէալ
29. Երկու օր . Տեժամեժօք համա-իւս .
 այլ օր . հասարարիւք իանգնէալ
 Վիժօք :
30. Մի օր . հարո-ցանէ :
31. Մի օր . քարաժոցս :
32. Երկու օր . Բրաժոյս :
33. Մի օր . Բազնաւգեժայ . դր :
 Զայսմանէ վկայէ և Յովհ . կա-
 թողիկոս 'ի Պատմագրութեանն
 իւրում այսպէս . « Այս Միհրը-
 » դաս երթայ ունի եւս և զԱ-
 » մասիս , որ բազում ամօք յա-
 » ռաջ շինեալ էր յԱմասիայ
 » յեղբորորդոյ Նեքտանեբայ
 » հրամանաւ Աղեքսանդրի որ-
 » դոյ Նեքտանեբայ , և ընդար-

32. ձակագոյնս զնա սլարսպէաց,
 33. և գրաւելով զնա 'ի Հայս' տիե-
 34. ղերասահման քաղաք զնա յար-
 35. դարեալ կոչէ. շինէ 'ի նմա և
 36. արքունիս ըստ հիւսիւսոյ կող-
 37. մանէ Ռիս գետոյ. իսկ յարե-
 38. լելից գիմակի քարանձաւին
 39. շիրիմս քարակոփա և տունս
 40. բրածոյս յօրինէ համանման
 41. ձեռակերտին Շամիրամայ որ
 42. 'ի Վան և 'ի Խազնաթգեղբայ":
34. Մի օր. Կիւրէն . . . Երկու օր.
 Կիւրացան . մի օր . Ժամանակս :
35. Երկու օրին . Եղիսոս Պոնփոսի .
 մեւան Ղեղիսոս Պոնփոս մեփոսաւօլիփ
 արարեալ :
36. Երկու օր . կարծեօք :
37. Երկու օրին . նոր :
38. Մի օրին . Փէրէմէոս . մեւան
 Փէրէմէոն . վերջինն գրեալ էր յըս-
 տօրեւ Փիփիմոս :
39. Երկու օրին . և Թերի օր . զօ-
 ղեալ սարսէնի :
40. Մի օրին . Լագաւորին :
41. Մի օր . 'ի Դափաւորէն . . . մեւան
 'ի Դափաւորացն :

42. Մի օրին . և թերին ունիցին :
43. Երկու օրին . և համարձախամարտի
էին կամ լինիցին զպաշտօն դից .
Թերին՝ աստուծոյ արհամարհէն :
44. Մի օրին . Սաբո-բէայ . մեւսն՝
Սաբոբէ : Իսկ թերին՝ ՚ի աստուծոյ
Աստուծոյն :
45. Մի օրին . յաւելու իրենցեալ :
46. Մի օրին . և հայրն սնուցանելով .
Իսկ մեւսն՝ ըստ զնա հօրն սնու-
ցանել :
47. Մի օր . և հասարակ և հասարակացն :
48. Մի օր . զարգացեալ սպանելէ զա-
րոտ , զճանկոտիանն զարեւ սոսրի
զգասար և պարիկալս յամենայնի :
49. Մի օր . և թերին յասարիս հա-
սակի մի օրին . Տորոտ խորա-
դիտ :
50. Երկու օր . ըստ զուր :
51. Մի օր . զոր յի-տոտի կնքեալ . իսկ
մեւսն՝ զոր քեռեալ զնա արու :
52. Մի օր . յաւելու յինքեան :
53. Մի օր . յաւելու իւր . թերին
սոս պէս իւրոյ :
54. Մի օր . ներեալ . մեւսն՝ երե-
ւոյ ՚ի :

55. Թերի օր . Ե-գափա : 07
56. Մի օր . հապէալ զՅիսկն անկա-
մեւան՝ զՅին անկա- . Թերին և
նսփա- :
57. Մի օր . 'ի փանէաց սրահին . մեւան՝
'ի սրահին իւրժէ :
58. Մի օր . հո-ալ է ուրջաօտալ Վիշապ
հարօր . իսկ մեւան . հո-ալ է այդ ուրջ
Վիշապի անար-ոյ :
59. Մի օր . շնասիցիս . Թերի օր .
շնասեացիս :
60. Մի օր . յով անկէալ . երկու օր .
հովուն անկէլոյ :
61. Մի օրին . յաւեղու ուրախացեալ :
62. Մի օր . փնիկն :
63. Մի օր . գալ Վիշապին . մեւան՝
ուրալէս իսալի-ն գայլոյ Վիշապին :
64. Թերի օր . յաւեղու էնող զնա
և շախեա- :
65. Մի օր . Վիշապին . . . էղէալ .
Թերին շայնապարանոյ :
66. Մի օր . իսալին :
67. Մի օր . հանէ :
68. Թերին լաւալէալ յեղէֆն :
69. Մի օր . ընդ սրբոյն Թեոդորոսի .
մեւան՝ և սրբոյն Թեոդորոսի :

Մի օր • կալոյիս զհասարակն հասարակ
սոսն :

71 • Մի օրինակ յաւելոլ աստէն
զկարճառօտ յիշատակարանս :

72 • Երեք օր • աստ և յատորեւ
ունին Մասիսիսէս :

73 • Թերի օր • սենեկասանին :

74 • Թերի օր • և շինն :

75 • Թերի օր • Ժաղր արարեր :

76 • Թերի օր • Կարակերտ :

77 • Թերի օր • Կոլր Լինէին :

78 • Թերի օր • սպիտակազգէտոյ :

79 • Այլ օրին • ասպանեւոյն :

80 • Թերի օր • համբերութիան :

81 • Այլ օր • սյուանելի :



Յ Ա Ն Կ

ԺԶ . ՀԱՏՈՐՈՅ

Ներսէսի Շնորհալուոյն պատաս-
խանի թղթոյն Գէորգեայ
առաջնորդի սրբոյ ուխտին
Հաղբատի յաղագս պատմու-
թեան երանելոյն Սարգսի . 5

Վկայաբանութի սրբոյն Սարգ-
սի զօրավարի և որդւոյ նորա
Մարտիւրոսի 11

Պատմութիւն Ամասիա քաղա-
քի , և յաղագս սննդեան և
վարուց սրբոյն Թէոդորոսի
զօրավարին 55

U N Φ E P P

Σ U Θ γ U γ U υ P

Φ E .



1

2

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

41

42

43

44

45

46

47

48

49

50

51

52

53

54

55

56

57

58

59

60

61

62

63

64

65

66

67

68

69

70

71

72

73

74

75

76

77

78

79

80

81

82

83

84

85

86

87

88

89

90

91

92

93

94

95


96

97

98

99

100



SDu

